

**Xujun xi tjun kitsikasenre San
Pablo xuta xi makjainre ngat'a
tse'e Jesucristo xi tjindu
naxinanda Corinto
1 CORINTIOS**

¹ An, Pablo, tetsikasen_nuu xujunbi, xi jngu apóstore Jesucristo jotsa'en kuamejénre Na'enchana nga ja'ajinna. An ko nts'ia Sóstenes tenikaseen xujunbi.

² Jun xi makjainnu ngat'a tse'e Jesucristo xi tet-subo naxinanda Corinto, ngat'are Cristo Jesús kitsitsjenu Na'enchana 'ba ja'ajinnu nga kuon xuta tsje xi tse'e, 'ba nga tu jngu kuon ko ngatsi'i xuta xi tsichjire ja'enre Na'enna Jesucristo. Xi Na'enna 'ba nde Na'enre xutabiu ngayeje.

³ Ngatjas'enu kjuanda ko kjuaxiu xi tsjana Na'enchana ko Na'enna Jesucristo.

⁴ Ngantsjai tsja_ra kjuanda Na'enchana ngat'anu, nga fa'etsjenna kjuanda xi kitsjanu ngat'are Cristo Jesús. ⁵ Ngu kisakunu ngat'are Jesucristo ngayéje kuya kjuanyina xi tsja Na'enchana, jotsa'en nga nda nukjuo 'ba jotsa'en nga kuankjinnu ngayéje xi tjin. ⁶ 'Ba 'batsa'en kis'ejñatsejenni ngajinnu nga kjuakixi en xi kis'eya nijmi ngat'a tse'e Cristo. ⁷ Kui kjua nijnguú kjuanda xi tsjana Na'enchana chajaninu nga techuya_ru nixtjin nga kjua'e ngani Na'enna Jesucristo. ⁸ 'Ba kixi= sikinyanu Na'enchana ka'nda nga kjuet'a nixtjin, tuxi bi s'eninu je

nixtjin nga kju'a'e ngani Na'enna Jesucristo. ⁹ 'Ba Na'enchana tsik'etjusun= mé= xi tsutitjun nga sa'en, 'ba kui= xi kinchjanu nga tu jngu kuon ko Ki'ndire, xi Na'enna Jesucristo.

¹⁰ Jun nts'ia, nga ko ja'enre Na'enna Jesucristo te'bets'a_nuu nga tujngu ngatjamantsjai kjuafa'etsjennu 'ba nga bi ngatjas'e kjuasi ngajinnu. Tusa jngu ti'on yojonu ngat'are jotsa'en nga nikja'etsjion 'ba nga jotsa'en 'yo ngat'are xi tjin. ¹¹ 'Bi texian, nts'ia, ngat'a xinkjin Cloé ye'ena nijmi nga kjuasixu tjin ngajinnu. ¹² Kibi= xi texinña ngat'a tjinxu xi tsu: "An= ña tse'e Pablo." 'Ba tjinxu xi tsu: "Tse'e Apolos= ña." 'Ba tjinxu xi tsu: "Tse'e Pedro= ña." 'Ba tjinxu xi tsu: "Tse'e Cristo= ña an."

¹³ ¿A nkjin= ya mani Cristo? ¿A Pablo= xi kis'et'a kru nga tu kjuanda tsojon? ¿Asa ja'enre Pablo kisatendañú? ¹⁴ 'Ba tsja_ra kjuanda Na'enchana nga nijnguú jun yatenda_nuu, tu Crispo sani ko Gayo. ¹⁵ Meni 'batsa'en ni'yá kuetsuni nga nga ko ja'enna kisatendani. ¹⁶ Ngu, 'ba=nde yatenda xinkjin chinga Estéfanos. Tunga bi fa'etsjenna tsa tjin xi yatenda ngisaa. ¹⁷ Ngu Cristo bi kui xa kitsikasennina nga xuta kuatendaa, tusa nga sikja'axtiuyaa en ndare 'ba nga bi en xi tsjatsu sichjaan nga kuinchjaa, tuxi bi chajani kju'a'ñu xi tjinre kjuabeyare Cristo nga k'ent'a kru.

¹⁸ Ngat'a en xi s'eya nijmi ngat'are kjuabeyare Cristo nga k'ent'a kru, tu jaan mare xuta xi in-yachaja. Tunga ngat'ana ña xi te'bangia, kui enbiu xi kju'a'ñure Na'enchana. ¹⁹ Ngat'a 'bi= tsa'en kua'indut'a enre Na'enchana: "Sichajaa

kjuachjinere xuta nkjin kakun, 'ba k'uejñat'axian xi tsikja'etsjen nchja xi mankjnre xi tjin."

²⁰ ¿Ñá tijña xuta nkjin kakun? ¿Ñá tijña xuta chjine xujun? ¿Ñá tijña xuta xi mare nchja ngat'a tse'e mé= xi tjin ngasun'ndio? Na'enchana je kit-siskayare kjuafa'etsjenre xuta xi tjin ngasun'ndio.

²¹ Ngat'a ngajin kjuankjin kakunre Na'enchana 'enda nga bi ko kjuankjin kakun xi tjinre xuta ngasun'ndio kuan skuexkunni kui. Tusa kuatsjare Na'enchana nga tsik'angi xuta xi makjainre ngat'a tse'e en xi kjinikja'axtiuyare, en xi tu jan mare xuta ngasun'ndio.

²² Ngat'a xuta judío mejénre skue chubā xi kuakutsejen kjua'ñure Na'enchana, 'ba xuta griego mangisjai kjuankjin kakun. ²³ Tunga jin tenikja'axtiuyee ngat'a tse'e Cristo xi kis'et'a kru. Xi 'bejñare kjuana'en xuta judío 'ba xi tu jaan mare naxinanda xi yak'a. ²⁴ Tunga xuta xi Na'enchana je kinchjare tuxi k'uangini, ninga xi judío, ninga xi griego, kui= xi kiskjebetjo Cristo xi kjua'ñure ko kjuankjin kakunre Na'enchana. ²⁵ Ngat'a xi tse'e Na'enchana xi tu jaan mare xuta, kui= xi ngisa tse kjuankjin kakun tjin ngisare nga ko mare kjuankjin kakun xi tjinre xuta. 'Ba xi tse'e Na'enchana xi tsajainre nga'ñu mare xuta, kui= xi ngisa tse nga'ñu tjin ngisare nga ko mare nga'ñu xi tjinre xuta.

²⁶ Jun, nts'ia, tikja'etsjion 'yá kuon kionga Na'enchana kinchjanu. Bi nkjin mañu xi xuta nkjin kakun mare xuta nga'e ngasun'ndio. Bi nkjin mañu xi ngaku, 'ba bi nkjin mañu xi nda 'yaxkunnu. ²⁷ Tunga Na'enchana ja'ajin= xuta xi

chikun mare xuta nga'e ngasun'ndio, tuxi sjanire kjuasuba xuta nkjin kakun. 'Ba Na'enchana ja'ajin= xuta xi tu jaan be xuta nga'e ngasun'ndio, tuxi sjanire kjuasuba nchja ngaku. ²⁸ Xuta xi bi 'yaxkun nga'e ngasun'ndio 'ba xi 'yaton, kui= xi ja'ajin Na'enchana, tuxi bi sichjinire xuta xi tjin. ²⁹ 'Ba meni tu'yá kuan nk'a k'uaxjeni yojore ngixkun Na'enchana.

³⁰ Tunga Na'enchana tu jngu kitsa'enkonu Cristo Jesús 'ba kitsa'en nga Cristo xi kuan kjuankjin kakunna. Ngat'are Cristo je kuakixia ngixkun Na'enchana 'ba kjinitsjena 'ba kuachjintjai jena. ³¹ 'Bamani, jotsa'en kua'indut'a enre Na'enchana: "Tsa tjin xi mejénre nk'a k'uaxje yojore, nk'a ngatja'baxje yojore ngat'are mé= xi kitsa'en Na'enchana."

2

¹ 'Ba an, nts'ia, kionga kija nga kit-sikja'axtiuya_nuu en xi Na'enchana 'ejña'mo nixtjin kuatse jan, bi en xi na'enre asa en xi tsjatsu kitsichjaan. ² Ngu, bi kuamejénna kinchjaa ngajinnu ngat'a tse'e kja'e tsajmi, tu ngat'a tse'e Jesucristo sani 'ba ngat'a tse'e kjuabeyare t'a kru. ³ 'Ba inda ts'axjia yojona nga tsakatejñajin_nuu. Kitsakjuan 'ba niki jatse=ña. ⁴ 'Ba kionga jako_nuu 'ba kitsikja'axtiuya_nuu enre Na'enchana, bi kitsichjaan en xi tsjatsu tuxi kuakjainnire xuta. Tusa Isennixtjintsjere ko kjua'ñure Na'enchana kis'ejñatsejen ngajinre en xi kinchjaa, ⁵ tuxi ngat'are kjua'ñure Na'enchana kuakjainninu 'ba bi ngat'are kjuankjin kakunre xuta.

⁶ Tunga ngajinre xuta xi je mankjínre ngat'a tse'e mé= xi tse'e Na'enchana, chuko nijmi=n̄i en nkjin kakun, tunga bi en nkjin kakun xi bakuya xuta, ninga bi xi tse'e xi batexuma nga'e nga-sun'ndio xi je inyatsichaja kjua'ñure. ⁷ Tusa chuba nijmij ngat'are kjuankjin kakunre Na'enchana xi tijña'mo. Kjuankjin kakun xi 'ejña'mo Na'enchana 'ba xi 'endatitjun nga kje tsindajín ngasun'ndio, tuxi s'enina kjuaje. ⁸ Nijnguú xi batexuma nga-sun'ndio kuankjinre kibiu. Ngat'a tsa kuankjinre, bi yat'a kru Na'enna xi tjinre kjuaje.

⁹ Tunga jotsa'en kua'indut'a enre Na'enchana: “Mé xi nisañajanni tsabe xuta 'ba bi kjint'e 'ba bi kuán kitsikja'etsjen, kui= xi Na'enchana 'endatitjun nga tu kjuanda tse'e xuta xi tsimején kui.” ¹⁰ 'Ba kui=bi xi 'ejñatsejenna Na'enchana ngat'are Isennixtjintsjere. Ngat'a Isennixtjintsjere Na'enchana kutsejenjin yeje xi tjin, ka'nda xi 'ñu 'mo tijña tse'e Na'enchana. ¹¹ Ngat'a, ¿a tjin= xuta xi be jótsa'en inyatsikja'etsjen xuta xi yak'a? ¿A bi tu nga jngu jngu xuta xi be jótsa'en titsikja'etsjen? 'Ba nde 'ba= tsa'enni tu'yá be mé= xi titsikja'etsjen Na'enchana. Tu jngu sani Isennixtjintsjere Na'enchana xi be.

¹² 'Ba bi isennixtjin xi tsa'exajinre ngasun'ndio kisakuna ña, tusa Isennixtjintsje xi ndibani ngat'are Na'enchana, tuxi kuankjinnina kjuanda xi kitsjana kui. ¹³ 'Ba ngat'are xi mixiín, bi nichjeen en xi bakuyani xuta xi nkjin kakun, tusa nichjeen en xi bakuyani Isennixtjintsjere Na'enchana. 'Ba 'batsa'en 'miya_ri xuta xi tijñajinre Isennixtjintsjere Na'enchana mé= xi

tse'e Isennixtjintsjio.

¹⁴ Tunga xuta xi tsajainre Isennixtjintsjere Na'enchana bi kjebetjo mé= xi tsja Isennixtjintsjio, ngat'a tu jaan mare. 'Ba nibi ma mankjínre ngayeje, ngat'a tu jngu saní Isennixtjintsjere Na'enchana xi 'bejñatsejen jó tjinnire kibiu. ¹⁵ Xi tijñajínre Isennixtjintsjere Na'enchana, kui= xi mankjínre jó tjinnire ngayéje xi tjin. Tunga xuta xi yak'a bi mankjínre jó kun xuta xi tjindujínre Isennixtjintsjere Na'enchana. ¹⁶ Ngat'a 'bi= tsa'en kua'indut'a enre Na'enchana: “¿'Yá= xi be mé= xi titsikja'etsjen Na'enchana? ¿'Yá= xi kuakuyare?” Tunga kjuafa'etsjenre Cristo kich'a ña, 'ba 'batsa'en nikja'etsjian jotsa'en tsikja'etsjen kui.

3

¹ An bi kuán jako_nuú, nts'ia, jotsa'en fakuá xuta xi batexumare Isennixtjintsjere Na'enchana, tusa fako_nuú jotsa'en fakuá xuta xi tsik'etjusun mé= xi mejénre yojore asa joni xuta xi sa'e k'uetuts'inre ngat'a tse'e Cristo. ² Kui kjuañu yakuyani_nuú joni nisti ki'ndi xi ndachiki tiba'ere 'ba bi tsajmi xi taja tjínikjine. Ngat'a bi kuankjinnu joni xuta chinga, ninga ka'nda nganda'e kje majínnu, ³ ngat'a tojo tenik'etjusun=ñu mé= xi mejénre yojonu. Kionga tjín ngajinnu kjuachini ko kjuasi, ¿a bi tsunire nga tojo tetsubo jotsa'en tjindu xuta xi bi makjainre ngat'a tse'e Na'enna Jesucristo? ¿A bi tsunire nga tojo tenik'etjusun mé= xi mejénre yojonu? ⁴ Kionga tjín xi tsu: “An tse'e Pablo= ña”, 'ba tjín xi tsu: “Tse'e Apolos= ña an”, ¿a bi 'ba teño'on joni xuta xi bi makjainre ngat'a tse'e Na'enna Jesucristo?

⁵ Ngu 'batsa'en tsu'ba, ¿'yá= kuán Pablo? ¿'Ba 'yá= kuán Apolos? Kui= xi tu chu'ndanu kuán, 'ba Ngat'are= kui kuakjainnu ngat'a tse'e Na'enna Jesucristo. Ngu nga jngui jngui kjiña'an=nij xa xi kitsjani Na'enchana. ⁶ An 'entjía, 'ba Apolos inyandangire, tunga Na'enchana xi kitsink'a. ⁷ 'Ba 'batsa'en tsu'ba, tumejín xi 'bentje ninga xi minyandangire. Tu Na'enchana sani xi tsink'a, kui= xi je. ⁸ 'Ba xi 'bentje ko xi minyandangire tu jngu. Tunga nga jngu jngu s'echjire jotsa'en nga kitsa'exa. ⁹ Ngat'a jín ñatjen= teña'axat'a_rí Na'enchana. 'Ba jun jo=ni tsujmi ntjere Na'enchana, 'ba jo=ni ni'ya xi kui ti'benda= ngayeje.

¹⁰ Ngat'are kjuandare Na'enchana xi kika'ena, nga an kuáan chamaestru chjinexjo xi 'enda tuts'in xjo. 'Ba nganda'e kja'e= tikjenitjen xjore ni'yo. Tunga nga jngu jngu nda ngatakutsejen jót'sa'en nga sindasun xjo. ¹¹ Ngat'a tu'yá nde kuan sindani kja'e tuts'in xjo nga ko mare xi je tikijño, ngat'a Jesucristo jo=ni tuts'in xjore ni'yo. ¹² 'Ba ngasun tuts'in ni'yo kuan xjunitjensun xjo xi kuandakoni oro, plata, asa ndiojo xi nda kun, yate, ndiji, asa xka ndaje. ¹³ 'Ba xa xi kitsa'en nga jngu jngu xuta s'ejñatsejen nixtjin nga kuanre kjua ngasun'ndio. Ngat'a ndi'i xi kjua'e kui nixtjinbiu skut'ayako 'ba kuakutsejen mé= kuya xa xi kitsa'en nga jngu jngu xuta. ¹⁴ Tsa xare xi kiskjen-itjensun tuts'inre xjo xukjuakore ndi'u, kui= xi sakure chjire. ¹⁵ Tunga tsa 'yá= xi kuiti xare, kui= xi sichaja mé= xi kitsa'en, ninga tsa tu kui tajngu k'uangi joni jngu xi ti'betukajin ndi'u.

¹⁶ ¿A bi 'yo nga jun= ñu ningure Na'enchana 'ba nga Isennixtjintsjere tijña ngajinnu? ¹⁷ Tsa tjin xi sikjekjua ningure Na'enchana, Na'enchana sikjekjua xi 'ba sa'en. Ngat'a tsje ningure Na'enchana, 'ba jun= ñu ningubiu.

¹⁸ Tu'yá ngata'bejñure yojore. Tsa tjin ngajinnu xi 'batsa'en tsikja'etsjen nga kui jngu xuta nkjin kakun ngajinre xuta xi tjin ngasun'ndio, tusa xuta xi tumé chjire ngatatsa'en yojore, tuxi kuanni jngu xuta nkjin kakun ngixkun Na'enchana. ¹⁹ Ngat'a kjuankjin kakun xi tjinre ngasun'ndebi, kui= xi tumé chjire ngixkun Na'enchana. Ngat'a 'bi= tsa'en kua'indut'a enre Na'enchana: “Na'enchana tsa'en nga ndekuini kjuamañare xuta nkjin kakun kajin.” ²⁰ 'Ba 'ba=nde tsa'en kua'indut'a ngayeje: “Na'enchana be= nga tumé chjire mé= xi tsikja'etsjen xuta nkjin kakun.” ²¹ 'Bamani, tu'yá nk'a ngata'baxje yojore ngat'are xuta xi tjenngire. Ngu tsojon ngayéje xi tjin. ²² A Pablo=, Apolos=, Pedro=, ngasun'ndio=, kjuabenichun= ko kjuabeyo, xi tjima nganda'e ko xi kuan; tsojon ngayéjebiu. ²³ 'Ba jun tse'eru Cristo, 'ba Cristo Na'enchana tse'e.

4

¹ 'Bamani tsu'ba, tu 'ba=tsa'en cha kakunnij joni xuta xi inyatsa'exat'are Cristo, nchja xi kitsja xare Na'enchana nga kuakuya mé= xi 'mo tijña ngat'a tse'e. ² Ngu, xi kika'ere jngu xa, tjinnere nga kixi kueko xare. ³ Tunga ngat'a tsa'an, bi mafonā tsa kuanna kjua ngixkún asa ngixkun juez xi tjin ngasun'ndio. Ninga bi sa'en_řa kjua yojonā ngayeje. ⁴ Ninga tsa xian nga tsje tjin

kjuafa'etsjenna, bi kui kjua kuatsjeniña ngixkun Na'enchana. Ngat'a xi tsa'enna kjua, kui= xi Na'enna. ⁵ Kui kjuañu bi jun tjun ña'anñu kjua kionga kje fa'ejín Na'enna Jesucristo. Kui kuakut-sejen mé= xi tijña'mo ña jñu chun, 'ba k'uejñatsejen jotsa'en tjindu inimare xuta. Kui nixtjinbiu tu Na'enchana xi nda kuinchja ngat'are xuta jotsa'en 'bakore mé= xi kitsa'en nga jngu jngu.

⁶ Nts'ia, tu kjuanda tsojon= nga te'bejña kusaan ngat'ana 'ba ngat'a tse'e Apolos, tuxi xiañu ngat'aní nga bi kuitjaxtiune_ru mé= xi kua'indut'a xujun. Bi nda tjin tsa nk'a kjui'naxjo yojonu ngat'are jngu xuta xi jun tjenngi_ru 'ba ch'o tsa'en xio xi kja'ere. ⁷ Ngat'a, ¿'yá xi tsu nga ji xi ngisa ndai ngajinre xuta xi yak'a? ¿Mé= xi tjinri xi bi kitsjari Na'enchana? 'Ba tsa kika'eri xi tjinri, ¿ánñu nk'a 'naxjeni yojori joni tsa ji kjiña'an tajngui?

⁸ Jun jo=ni xuta xi je 'ñu kitsere, jo=ni xuta nyina. Jun jo=ni rey xi bi nde machjenni_ri_jin. Mejénna nga rey kjuakixi kuon tsakaiñu, tuxi ko jin sakut'anini xanu nga ñatjen kuatexuma. ⁹ Ngu 'batsa'en tsikja'etsjia an nga jin xi apóstol kuáin, Na'enchana kitsikinyani nga'nde xi fet'ani, joni nchja xi tjinnere nga kjuinik'en. 'Ba ankjele ko xuta kutsejen'akunni jótsa'en nikja'andaini ngixkun. ¹⁰ Jin jo=ni xuta chikun kuáin ngat'a Cristo teña'axat'a_ri, tunga jun= xi xuta nkjin kakun ngat'a tu jngu mo ko Cristo. Jin= xi xuta inda, tunga jun tjinnu nga'ñu. Jun= xi 'ñu nda benu xuta, tunga jin betonni.

¹¹ 'Ba ka'nda nganda'e temitjaxtii kjindia ko

xinda. Tsajainni najñu 'ba tibichut'ani 'ba tu chuba tetsumasun=ni. ¹² 'Ba tifejndani nga 'ñu teña'axai. Ch'o tsuni xuta, tunga 'bets'a=ni ngat'a tse'e xi 'ba tsuni, tuxi Na'enchana sichikunta'enni ninga 'ba inyatsu. Tjenngikenj xuta, tunga chukjuako=ni. ¹³ Ch'o tsa'en fakoni xuta, tunga en nda ningojo_ri xi 'ba tsuni. Jo=ni xtje bekakunni xuta ngasun'ndio, joni tsajmi xi tumé chjire ka'nda nixtjin nganda'e.

¹⁴ Bi tetsi'indu_nuu kibi, tuxi sjani_nuu kjua-suba. Tusa tefakoya_nuu jun xi joni ki'ndina xi 'ñu tsimijaan. ¹⁵ Ngu, ninga tsa te mi xuta s'enu xi kuakuyanu ngat'a tse'e Cristo, tunga bi nkjin na'en s'enu. Ngat'a jo=ni na'ennu kuáan an ngat'are Cristo Jesús nga kitsikja'axtiuya_nuu en ndare. ¹⁶ 'Ba 'batsa'en tsu'ba, 'bets'a_nuu nga chunginuu. ¹⁷ Kui kjua tetsikasenni_nuu Timoteo, xi jo=ni ki'ndina xi 'ñu tsimijaan 'ba xi nda makjainre ngat'a tse'e Na'enna Jesucristo. Kui= xi sikja'etsjenyanu jótsa'en tefikua yojona ngat'are Cristo Jesús, 'ba jótsa'en bakuya ngaya ngayéje ninga xi tjin tuña nga'ndeñu.

¹⁸ 'Ba tjin yak'a ngajinnu xi nk'a inya'baxje yojore nga inyatsikja'etsjen nga bi kjuikun_nuu. ¹⁹ Tunga kjuikun xati_nuu tsa Na'enchana mejénre, 'ba meni kio skuiá mé= xi mare ña'an xi nk'a 'baxje yojore, 'ba nga bi tsa tu enre xi 'ba tsu. ²⁰ Ngat'a bi en xi tsja tsu xi bakutsejen jotsa'en batexuma Na'enchana, tusa jotsa'en fiko yojore xuta bakutsejen kjua'ñure Na'enchana. ²¹ ¿Jótsa'en mejénnú? ¿A kjuatiko_nuu 'ba sikja'a_nuu kjuanima nga kjuechukun_nuu? ¿Asa kjuiko_nuu

kjuanimejen ko kjuant'ekjua?

5

¹ 'Ba kjuakixi= nga tjinu'yare nga tjin ngajinnu jngu xi ndekuini najunre tijñakoni. Ka'nda xuta xi bi makjainre ngat'a tse'e Na'enchana bi 'ba tsa'en.

² 'Ba tu ngisa= nk'a 'naxjo yojonu nga'ndere nga s'enu kjuaba. Kui xuta xi 'ba titsa'en tjinnere nga kjui'naxjejiun ngajinnu.

³ 'Ba an, ninga bi tejñajin_nuu, tunga tijñakonu kjuafa'etsjenna. 'Ba jo=ni tsa tejñajin_nuu, nga kitsa'en_ra kjua nga yanejia xuta xi 'ba titsa'en. ⁴ Kionga ko ja'enre Na'enna Jesucristo kuañajant'a_ru xingiu, 'ba=nde k'uejñajinnu kjuafa'etsjenna ko kjua'ñure Na'enna Jesús ngayeje. ⁵ 'Ba kio singantsjare chanayiu xuta xi 'ba titsa'en, tuxi kjuetsunni yojore xi tjinre je 'ba k'uangi inimare nixtjin nga kjua'e ngani Na'enna Jesús.

⁶ Bi nda tjin nga nk'a kjui'naxjo yojonu. ¿A bi 'yo nga jngu stinchi na'yu san tsisan yeje ninga tse na'yu? ⁷ Tisent'axin_ru na'yu san chinga xi titsikjetsunnu, tuxi kuanñu joni na'yu xatse xi tsajainre na'yu san, xi joni na'yu xi nichjan nga s'i pascua. Jun=ñu xi kui nganda'e, ngat'a Cristo xi chutsangare s'i pascuana je k'enntjaina. ⁸ 'Bamani tsu'ba, kjui'naxjia s'iu nga sichjan niñuxtila xi tsajainre na'yu san. Xi tsunire nga tsje tijña inimana 'ba nga tjin ngajinna kjuakixi. 'Ba xanikja'a na'yu san chingó, xi tsunire kjuats'en ko kjuach'o.

⁹ 'Ba xujun xi sa kitsikasen_nuu kixin_nuu nga bi sijnguko yojonu xuta xi tjindujin kjuaska.

¹⁰ Tunga nga 'ba kixin_nuu, bi kixin_nuu nga

kuinyat'axinkjin_ru xuta xi bi makjainre ngat'a tse'e Na'enna Jesucristo xi tjindujin kjuaska, asa xi 'ñu mejénre tsajmi, asa xi tsa'en cheje, asa xi tsichjire na'en xi ntsja xuta kuandani. Ngat'a tsa bi mejénnú kuetsubajin_ru xuta xi 'ba inyatsa'en, tjinne=re nga k'uetju nga'e ngasun'ndio. ¹¹ Tusa kixin_nuu nga kitsi'indu_nuu nga bi nijnguko yonon tu'ya xi nts'ia tsure yojore tunga tojo tijñajin kjuaska, asa xi 'ñu mejénre tsajmi, asa tsichjire na'en xi ntsja xuta kuandani, asa nchja en ch'otsu, asa mach'i, asa tsa'en cheje. Xi 'ba tsa'en ka'nda bi chineko niñu.

¹² Ngat'a bi an 'bakona nga sa'en_ra kjua xi tjindu ngandetsian, xi bi makjainre ngat'a tse'e Na'enna Jesucristo. Tunga ¿a bi jun 'bakonu nga si'an_ru kjua xi tjindu ngaya, xi makjainre? ¹³ Ngat'a Na'enchana sa'enre kjua xi tjindu ngandetsian. Kui kjuañu tichuxjejinñu ngajinnu xuta xi timajngi je.

6

¹ 'Ba kionga ngajinnu tjin jngu xi tjinkore kjua ko kja'e nts'ia, ¿a kuan= kakun nga ngat'are xutaxa xi bi bekun Na'enchana kjuik'endako kjua nga'ndere nga ngixkun xuta tsjere Na'enchana?

² ¿A bi 'yo nga xuta tsjere Na'enchana sa'enre kjua naxinanda xi tjin ngasun'ndio? 'Ba tsa jun si'an_ru kjua naxinando, ¿ánñu bi maninu 'benda kjua xi ichi? ³ ¿A bi 'yo nga ka'nda ankjeleña si'an_ra kjua? Kui kjuañu tjinnenire kuanna k'uenda kjua xi tisakuna ngasun'ndio.

⁴ Kui kjuañu kionga tjinkonu kjua xingiu ngat'are kjua xi tjin ngasun'ndio, ¿ánñu nchja

xi bi 'yakun ngajinre xuta xi makjainre ngat'a tse'e Na'enna mangichunñu nga k'uenda kjuanu? ⁵ 'Bi xin_nuu tuxi kuasubaninu. ¿A nijngukjín=tjin ngajinnu xi nkjin kakun, xi kuanre k'uendare kjua nts'ia? ⁶ Tunga xi tjima ngajinnu, ndekuini nts'ia inyabangi xinkjin 'ba ngixkun xutaxa xi bi makjainre ngat'a tse'e Na'enna 'ba inyatsa'en.

⁷ Ngu nga nde jun tjis'ekonu kjua xingiu, kui= xi ne ch'o tjin. ¿A bi ngisa nda ni tsa xukjuakonu tume kjua xi bi 'ba tjin xi kuato'on? ¿A bi ngisa nda ni tsa kua'e'ndio nga si'annu cheje? ⁸ Tunga nde jun= teña'anñu xi bi 'ba tjin 'ba ko cheje. 'Ba nts'ia xi 'ba teniko.

⁹ ¿A bi 'yo nga xuta ch'okun bi sakure nga'nde ña batexuma Na'enchana? Bi 'bejñu_ru yojonu. Bi kjua'as'en ña batexuma Na'enchana xuta xi tjin-dujin kjuaska, 'ba xi tsichjire na'en xi ntsja xuta kuandani, 'ba xi kjuachajngi tsa'ent'are xinkjin, 'ba xi xanda, ¹⁰ ninga xi tsa'en cheje, ninga xi 'ñu mejénre tsajmi, xi mach'i, 'ba xi nchja en ch'otsu, 'ba xi 'bonachare xuta xi kja'ere. Ngatsi'i xuta xi 'ba tsa'en, bi sakure nga'nde ña batexuma Na'enchana. ¹¹ 'Ba kui=biu xi 'ba nde kitsa'en yak'a xi tjin ngajinnu nixtjin kuatse jan. Tunga nganda'e je= kisanejun, je kuatsjio, 'ba xuta kixi= je kuon ngixkun Na'enchana ngat'are mé= xi kitsa'en Na'enna Jesucristo ko Isennixtjintsjere Na'enchana.

¹² “Ma= tsa'aan tume tsajminu”, tsu xuta. 'Ba= tjin tsakaiñu, tunga bi nda ngayéje kibiu. Ninga tsa ma tsa'aan tume tsajminu, tunga bi sja'ndia tsa kui xi kuatexumana. ¹³ “Xi chine tse'e= ngats'a, 'ba ngats'a tse'e= xi chine”, tsu xuta ngayeje. 'Ba=

tjin tsakaiñu, tunga Na'enchana sikjekjua ngojó. Bi kich'a yojona tuxi siskakoña. Tusa yojona tse'e= Na'enna, 'ba Na'enna tse'e yojona. ¹⁴ Jotsa'en nga ko kjua'ñure Na'enchana kitsikja'ayare Na'enna ngajinre mik'en, 'ba=nde tsa'en sikja'ayana ña ngayeje.

¹⁵ ¿A bi 'yo nga yojonu, jo=ni tsa ichi yojore Cristo? Kui kjuañu, jngu xuta xi ichi yojore Cristo ya'a, ¿a sikjen yojore tuxi sijngukoni jngu chjun ska? ¡Ngu niñajanni! ¹⁶ ¿A bi 'yo nga xi tsiko jngu chjun ska, kui xi tsijnguko yojore chjun sko? Ngat'a 'ba=tsa'en kua'indut'a enre Na'enchana: "Tu jngu kuan yojore ngojó." ¹⁷ Tunga xi tu jngu tsa'en ko yojore Na'enna, kui= xi tu jngu kuan ko kjuafa'etsjenre ngayeje.

¹⁸ Kui kjuañu tisent'axin_ru ngayéje kuya kjuaska. Tume je xi kja'ere xi tsa'en xuta bi fa'as'enjin yojore. Tunga xi tijñajin kjuaska, nde kui tajngu tikjejeta'enni ngat'are yojore. ¹⁹ ¿A bi 'yo nga yojonu xi ningure Isennixtjintsje xi tijñajinnu, xi Na'enchana kitsjanu? 'Ba bi nde tsojon tajnguni yojonu. ²⁰ Ngat'a kuachjintjaiñu nga tsindanu. Kui kjua tichjenñu yojonu nga sichji_ru Na'enchana.

7

¹ Mejénna kjuako_nuu nganda'e ngat'a tse'e xi kichjaningiyanuu nga kjinikasennuu xujun. Nda= tjin tsa jngu xuta bi siko jngu chjun. ² Tunga ngat'are kjuaska xi matsjare yojona, kui kjua tusa ngisa ndani nga jngu jngu xi'in ngatjas'ere chjunre, 'ba nga jngu jngu chjun ngatjas'ere xi'inre.

3 'Ba xi xi'in kuán ngatatsik'etjusunre chjunre nga siko, 'ba nde xi chjun kuán ngatatsik'etjusunre xi'inre ngayeje. 4 Ngat'a xi chjun kuán bi nde kui tajnguni batexumanire yojore, ngat'a 'ba=nde batexumare xi'inre ngayeje. 'Ba nde 'ba=tsa'enni xi xi'in kuán. Bi nde kui tajngu batexumanire yojore, ngat'a 'ba=nde batexumare chjunre ngayeje. 5 'Bamani, bi 'bech'o_ru yojonu xingiu. 'Ba tsa 'ba si'on, t'endako titjun xingiu, tuxi 'batsa'en chuba nixtjin singantsjakjinni_ru yojonu nga xuko Na'enchana. 'Ba jaskan kuetsuko ngañu xingiu, tuxi bi skut'ayakoninu chanayiu, nga bi xukjuakonu nga k'uechjon_ru yojonu.

6 Nga 'ba texin_nuu, tetsja'nde_nuu nga kuan 'ba si'on. Bi kjuatexuma xi tetsja_nuu tsa tjinnere nga 'ba si'on. 7 'Ba mejénna tsakaiñu tsa ngatsi'i xuta kuan joni an tsakaiñu, tunga ja kja'e ja kja'e kjuanda kitsjana Na'enchana nga jngua jngua. Bi tu jngu kjuanda xi kika'ena.

8 'Ba xin_ra xuta xi tsajainre chjun 'ba ko yanchjin xi tsajainre xi'in 'ba ko yanchjin k'an, nga nda= tjin tsa 'batsa'en k'uendu joni an. 9 Tunga tsa bi xukjuare nga k'uechjonre yojore, tusa ngatixan. Ngat'a ngisa= nda tjin nga kuixan tu 'bani nga 'ñu kuetsu inimare.

10 Ngu, xi je tsixan tetsja_ra kjuatexumabi, kjuatexuma xi bi tsa'an, tse'e= Na'enna Jesucristo. Xi chjun kuán bi ngatsik'ejña xi'inre. 11 'Ba tsa sik'ejña xi'inre, bi nde ngatixanni asa tusa ngatjakonda ngani xi'inre. 'Ba nde 'batsa'enni xi xi'in kuán bi ngatsik'ejña chjunre.

¹² 'Ba ngat'are xuta xi yak'a, an xin_řa, bi tsa Na'enna Jesucristo xi 'batsa'en batexumare. Tsa jngu nts'ia tjinre jngu chjun xi bi makjainre ngat'a tse'e Na'enna Jesucristo, 'ba tsa 'batjin kakun chjunre nga k'uejñako, bi ngatatsik'ejña. ¹³ 'Ba tsa jngu ndichja tjinre xi'in xi bi makjainre ngat'a tse'e Na'enna Jesucristo 'ba tsa 'batjin kakun xi'inre nga k'uejñako, bi ngatatsik'ejña. ¹⁴ Ngat'a xi xi'in kuán xi bi makjainre ngat'a tse'e Na'enna Jesucristo, matsje ngixkun Na'enchana tu ngat'are chjunre xi makjainre. 'Ba chjun xi bi makjainre ngat'a tse'e Na'enna Jesucristo, 'ba=nde matsje ngixkun Na'enchana tu ngat'are xi'inre xi makjainre. Tsa bira 'batjin, ki'ndinu bi tsje ngixkun Na'enchana. Tunga nganda'e je tsje ngixkun Na'enchana ki'ndi nistinu.

¹⁵ Tunga tsa xi bi makjainre ngat'a tse'e Na'enna Jesucristo mejénre sik'ejña chjunre asa xi'inre, ngu, ngatsik'endu xinkjin. Ngu tsa 'batsa'en, bi nde kjinenire nga nts'ia asa ndichja k'uejñako xi bi makjainre ngat'a tse'e Na'enna Jesucristo. Ngat'a Na'enchana kinchja=na tuxi nga kuetsuba s'enina kjuaxiu. ¹⁶ Ngu, ¿jót'sa'en 'yani ji xi chjun kuáin tsa kuanri kjuinik'angi xi'inri? 'Ba, ¿jót'sa'en 'yani ji xi xi'in kuáin tsa kuanri kjuinik'angi chjunri?

¹⁷ Tunga ngat'endu nga jngu jnguu jotsa'en tijña kjuanda xi kitsjare Na'enchana 'ba jotsa'en tjindu nga kinchjare Na'enchana. Kui=bi xi 'bene_řa ngatsi'i xi makjainre ngat'a tse'e Na'enna Jesucristo. ¹⁸ Tsa kjinukjuare xi kuán circuncidar, ngu janda ngatjama circuncidar. 'Ba tsa kjinukjuare xi bi kuán circuncidar, ngu, bi 'ba ngatjamata'en.

¹⁹ Ngat'a tsa kuán circuncidar asa bi kuán circun-

cidar, bi kui xi chjire. Tu kio sani nga sik'etjusan kjuatexumare Na'enchana, kui= xi chjire.

²⁰ Ngu, nga jngu jnguu janda 'batsa'en ngat'endu jotsa'en tjindu nga kinchjare Na'enchana. ²¹ Tsa chu'nda kuáin kionga nga kjinukjuari, bi nikjo_ri yojori. Tunga tsa saku ndiyari nga kuandai, ngu tindai yojori. ²² Ngat'a xi chu'nda nga kjinukjuare tuxi kuajngukoni Na'enna Jesucristo, nganda'e kui= xi je ndai ngixkun kui. 'Ba nde 'batsa'enni ngat'are xi xuta ndai nga kjinukjuare, nganda'e nde kui= xi chu'ndare Cristo. ²³ Tse 'echjintjainu Na'enchana nga kuando, kui kjuañu bi ba'e'ndeñu nga chu'ndare xuta kuon. ²⁴ 'Bamani tsu'ba nts'ia, jotsa'en tetsubo nga kjinukjuanu, janda 'batsa'en tetseubo ngixkun Na'enchana.

²⁵ 'Ba ngat'are yanchjin xi kje tjiñre xi'in, nijnguú kjuatexuma xi tse'e Na'enna Jesucristo tjinna xi sja_ra. Tunga xin_nuu jotsa'en tsikja'etsjian. Ngat'a Na'enchana ja'animara nga kitsa'enna jngu xi ma chunre. ²⁶ Ngu ngat'ana nda= tjin nga 'batsa'en ngat'endu xuta jotsa'en nga tjindu, tu ngat'are kjuana'en xi tjin nganda'e. ²⁷ Tsa tjinri chjun, bi mijnyisjai ndiye jotsa'en sik'ejñe. 'Ba tsa tsajainri, bi mijnyi. ²⁸ Tunga tsa kuixain, bi chjuje tsa 'ba si'en. 'Ba tsa jngu chjun xungu bixan, 'ba nde bi kjeje tsa 'ba sa'en. Tunga xi bixan, kui= xi s'ere kjuasti xi tse'e ngasun'ndio, 'ba an mejénna k'uejñat'axin_ra kjuastibiu.

²⁹ Nts'ia, ki=bi xi mejénna xin_nuu: Tu chuba nixtjin tijña ngisana. Kui kjuañu nixtjin xi chaja ngisa, xi tjinre chjun ngat'endu joni tsa tsajainre.

³⁰ 'Ba xi tjinre kjuaba ngat'endu joni tsa tsajainre kjuaba, xi tjinre kjuatsja ngat'endu joni tsa tsajainre kjuatsja, xi batse tsajmi ngat'endu joni tsa tumé tjinre, ³¹ 'ba xi titsichjen xi tjin ngasun'ndio ngat'endu joni tsa tumé chjire tsajmibiu. Ngat'a kjue ngasun'nde xi te'ya nganda'e.

³² Mejénna nga bi sikjo_ru yojonu. Xuta xi sa'e tijña tajngu, xi kje tjiínre chjun, kui xi tsikja'etsjen xi tse'e Na'enna Jesucristo 'ba jó sa'en tuxi tsja s'enire kui. ³³ Tunga xi tjinre chjun, kui xi tsikja'etsjen tsajmi xi tjin ngasun'ndio 'ba jó sa'en tuxi tsja s'enire chjunre, ³⁴ 'ba 'batsa'en bi nde tu jnguni xi tsikja'etsjen. Jngu chjun xi tsajainre xi'in ko jngu chjun xungu, kui xi tsikja'etsjen mé= xi tse'e Na'enna Jesucristo 'ba jótsa'en kuatsje yojore ko kjuafa'etsjenre. Tunga yanchjin xi tjinre xi'in, kui xi tsikja'etsjen tsajmi xi tjin ngasun'ndio 'ba jó sa'en tuxi tsja s'enire xi'inre.

³⁵ Tu kjuanda tsojon nga 'ba texin_nuu 'ba bi te'bet'a'ñu_nuu. Mejénna kuaseko_nuu, tuxi kixi kuetsubañu 'ba singantsjakjin_ru yojonu Na'enna Jesucristo nga tu jngu xi sikja'etsjon.

³⁶ Tsa tjin xi tsu nga je tjinnere kuixanko chjun xi tijñangire kjua ngat'a bi xukjuare nga k'uechjonre yojore 'ba je nure nga kuixan, tsa 'batsa'en tsikja'etsjen nga kui xi ngisa nda tjin, ngatatsa'en jotsa'en timamejénre. Ngatixan. Bi kjeje tsa 'ba sa'en. ³⁷ Tunga xi tjiingungu kakun nga bi kuixan 'ba nga bi tjinnere nga 'ba sa'en 'ba bere kakun nga ma 'bechjonre yojore, tsa tsikja'etsjen nga tusa nda tjin nga bi kuixan, ngisa= nda tjin tsa 'ba sa'en. ³⁸ Ngu, xi kuixanko ko chjun xi tijñangire

kjua, nda= tjin tsa 'ba sa'en. 'Ba xi bi kuixan, ngisa= nda tsa 'ba sa'en.

³⁹ Jngu chjun xi je tsixan, tjit'añu ngixkun xi'inre yejerañu xi'inre tijña ngisa. Tunga tsa kueya, je kuandai ngani 'ba kuan kuixanko tu'ya xuta xi mejénre, nga tunga xuta xi makjainnre ngat'a tse'e Na'enchana. ⁴⁰ Ningara ngisa nda k'uejña tsakaiñu tsa bi nde kuixanni. Ngu 'batsa'en tsikja'etsjan an, 'ba manā an nga tijñajinna Isennixtjintsjere Na'enchana nga 'ba texian.

8

¹ 'Ba nganda'e, mejénna kjuako_nuu ngat'are tjiuba xi kjinik'en joni chje ngat'are na'en xi ntsja xuta kuandani. 'Yaña nga ngatsi'a mankjinna mé= xi tjin. Xi mankjínre xuta, kui xi tsink'a kakun. Tunga kjuanimejen, kui xi tsja nga'ñure xuta. ² Tsa tjin xi 'batsa'en tsikja'etsjen nga mankjínre me=ñu, kui xi kje majínre xi tjinni nga kuankjinre tsakaiñu. ³ Tunga tsa tjin xi tsimején Na'enchana, Na'enchana be= xutabiu.

⁴ Ngu ngat'are xichine xi joni chje ba'ere na'en xi ntsja xuta kuandani, ¿a kuan xina? 'Yaña nga na'en xi ntsja xuta kuandani tumé chjire nga'e ngasun'ndio 'ba nga tsajain ngisa kja'e Na'en. Jngututu ma sani Na'enchana. ⁵ Tjin xuta xi tsu nga nkjin mani xi na'en 'mi 'ba nkjin mani xi nai 'mi xi tjindu ngank'a 'ba ko t'anangiu. ⁶ Tunga ngat'ana, jngututu mani Na'enna. Xi Na'enchana xi kitsinda ngayéje xi tjin 'ba xi ngat'are nga tetsuba ña. 'Ba nde jngututu mani Naina. Xi Jesu-

cristo xi ngat'are tjin ngayéje xi tjin 'ba xi ngat'are tetsuba ña.

⁷ Tunga bi ngatsi'i xuta mankjínre kibi. Tjin xi je 'batsa'en ngare nga tsichjire na'en xi ntsja xuta kuandani. 'Ba kionga kjine xichine xi joni chje ba'ere na'enbiu, tsikja'etsjen nga na'enbiu tse'e xichinebiu. 'Ba 'batsa'en ngat'are xi kjine ch'o tsa'en tsik'ejña kjuafa'etsjenre xi inda kjiya.

⁸ Kjuakixi= nga bi ngat'are xi china skjebetjona Na'enchana. Bi ngisa nda kuan tsa xine_ra, 'ba bi ngisa ch'okun kuan tsa bira xina. ⁹ Ndaiñu ngat'are mé= xi ma xino. Tunga chutsijon nga xi techino bi ngatatsikajngi je xuta xi bi titsujngu kakun ngat'are mé= xi makjainna.

¹⁰ Ngat'a tsa tjin xi kje titsujnguú kakun ngat'are mé= xi makjainna xi skueri ji xi mankjínri kibi nga teni ningure jngu na'en xi ntsja xuta kuandani nga techine xi kio tjin, ¿a bi ko kui kuan kakun skine xichine xi joni chje kika'ere na'enbiu? ¹¹ 'Ba 'batsa'en ngat'are xi mankjínri, chajani nts'ia, xi kje tijnguú kakun ngat'are mé= xi makjainna xi Cristo k'enntjai ngat'are.

¹² 'Ba temijnyije=ñu ngat'are Cristo kionga mijnyijio ngat'are nts'io nga ni'ñu kakun nga sa'en mé= xi ch'o tsa'en tsik'ejña kjuafa'etsjenre.

¹³ 'Bamani, tsa ngat'are xichinena tsa'aan nga kjeje nts'ia, tusa niñajani nde skineña yojo, tuxi bi sikajngijeña nts'ia.

9

¹ ¿A bi xuta ndai kuáan? ¿A bi apóstol kuáan? ¿A bi ko tuxkuaan tsa'bekoña Na'enna Jesús? ¿A bi makjainnu ngat'a tse'e Na'enna tu ngat'are nga

'ñu tsa'exat'a_řa kui? ² Ninga tsa tjin xi tsu nga bi jngu apóstol kuáan, tunga ngat'anu kui= ña. Ngat'a makjainnu ngat'a tse'e Na'enna, 'ba 'ba=tsa'en s'ejñatsejenni nga kjuakixi jngu apóstol kuáan.

³ 'Bi=tsa'en tsikjant'aa yojona ngixkun xuta xi tsu nga bi apóstol kuáan: ⁴ ¿A bi tjinni ndiyare nga sakuni xichine ko xi 'yu? ⁵ ¿A bi tjinni ndiyare nga s'eni chjun xi makjainre ngat'a tse'e Na'enna, xi k'uetsumakoni jo inyatsa'en nchja chinga apóstol xi yak'a ko nts'e Na'enna ko Pedro? ⁶ ¿A tu jin sani an ko Bernabé xi bi tjinni ndiyare nga kuajngi'ani xi makjainre ngat'a tse'e Na'enna?

⁷ ¿A tjin= chasoldadu xi tjinnere 'bechjisubare yojore ngat'are mé= xi machjenre? ¿A tjin= xi 'bentje uva 'ba bi kjine ture? ¿A tjin= xi tsikuenda jngu stin tjiuba 'ba bi 'bi ndachiki xi 'baxje? ⁸ ¿A tu kjuafa'etsjenre xuta= xi texin_nuu? ¿A bi 'ba nde tsa'en kua'indut'a kjuatexumo ngayeje? ⁹ Ngat'a 'ba=tsa'en kitsi'indu Moisés kjuatexumo: “Bi na'ñu be'o ts'a tjiundijo xi tjimachjen nga timitjia trigo.” ¿A tu ngat'are tjiundijo= mafore Na'enchana nga kitsu kibi? ¹⁰ ¿A bi kjuanda tsajan ngayeje nga 'ba kitsu? Jun, kua'indut'a kjuatexumo nga tu kjuanda tsajan. Ngat'a xi bakjan nangiu 'ba ko xi mitjia trigo, kui= xi tjinnere nga skunre nga sakure ture.

¹¹ Kui= kjuañu, tsa jin te'bentjee ngajinnu xi tse'e Na'enchana, ¿a tse xi techje'ee tsa sakuchini mé= xi tjinnu nga'e ngasun'ndio? ¹² Tsa kja'e xi tjinre ndiyare nga sakure mé= xi tjinnu, ¿a bi ngisa tjinni ndiyare tsakaiñu?

Tunga bi nichjeen kjuañuni. Tusa

tichukjuakoni ngayéje xi mata'een, tuxi bi ch'a kuanire xuta xi tis'eyare nijmi en ndare Cristo. ¹³ ¿A bi 'yo nga xi chinere xuta xi tsa'exa ningure Jerusalén= ndibani chje xi fechuko xuta? Xi tsa'exat'a altar sakut'achire yojore tjiuba xi kio nik'en joni chje. ¹⁴ 'Ba=nde tsa'en 'enda Na'enna Jesucristo nga xuta xi fa'axtiuyare en ndare sjare mé= xi machjenre xi tsikja'axtiuya ion.

¹⁵ Tunga an niñajanni kitsichjaan kjua'ñuni. 'Ba ninga bi tetsi'indu nuu tuxi kua'eninu u tsajmi. ¿Tusá mejénna nga titjun kueya tsa tjin xi kjua'ana kjuatsjabi nga 'ba tsa'aan! ¹⁶ Ngat'a nga tet-sikja'axtiuyaa en ndare Jesucristo, bi kui kjua nk'a k'uaxjeña yojona. Ngat'a kui xa xi Na'enchana 'enenā nga sa'aan. 'Ba nimaxuni ngat'ana tsa bi 'ba sa'aan. ¹⁷ 'Bamani, tsa tu kui kjua nga mejénna nga 'ba tetsa'aan, 'ba=tjinni nga sakuna chjina. Tunga bi tsa an xi 'batsa'en kuamejénna, jngu xa xi 'batsa'en kis'enenā. ¹⁸ Kui kjuañu, ¿mé= xi chjina? Kui= kibi. Kjuatsja xi tjinna nga bi fa'achjia nga tsikja'axtiuyaa en ndare Jesucristo, asa jo mixan nga bi tsichjia kjua'ñu xi tjinna nga mi'a mé= xi machjenna.

¹⁹ Jotsa'en bi fa'achjia 'ba=nde tsa'en tsajain xi tjinnere nga sik'etjusun ra, tunga chu'ndare ngatsi'i xuta= tsa'aan yojona, tuxi 'batsa'en nkjin xuta sa'en ngisaña nga k'uangi ngat'are Cristo. ²⁰ Ngajinre xuta judío tsa'aan yojona joni xuta judío, tuxi sa'enña nga k'uangi kui. Ninga tsa bi batexumana kjuatexumare Moisés, tunga ngajinre xuta xi batexumare kjuatexumo tsa'aan yojona joni tsa ko an batexumana, tuxi sa'enña nga

k'uangi kui. ²¹ 'Ba ngajinre xuta xi bi judío, xi tsajainre kjuatexumare Moisés, tsa'aan yojona joni tsa ko an tsajainna kjuatexumo, tuxi sa'enña nga k'uangi kui. Tunga bi tejñat'axin_ra kjuatexumare Na'enchana, ngat'a tetsik'etjusun=ña kjuatexumare Cristo.

²² 'Ba ngajinre xuta xi bi tijjngu kakun ngat'are mé= xi makjainna, tsa'aan yojona joni tsa ko an bi tijjngu kakuñ, tuxi sa'enña nga k'uangi kui. Ngu, tetsa'aan yojona jó= kun nga jngu jngu xuta, tuxi kuan sik'angi yak'aña. ²³ Tetsa'enyajaa kibi tuxi kuajesun yejenen ndare Jesucristo, tuxi ko an sakut'anina kjuanda xi tsja enndo.

²⁴ ¿A bi 'yo, kionga nkjin mani xi mangatsanga chuya, jngu sani xi tsa'en? Kui kjuanda tiyutsangañu, tuxi si'anña. ²⁵ Xuta xi mangatsanga chuyane nda 'bendunda 'ba 'bechjon yejere yojore xikuan si'onre. Ngu 'batsa'en tuxi sa'enni jngu kjuatjo xi ta'a fekjua. Tunga ña tebeninda=ña tuxi si'anña mé= xi bi fekjua. ²⁶ 'Ba ngat'ana, temangatsanga kixikixiña ka'nda nga'nde ña fet'a. Bi tekjaan joni jngu xi tu chuba tibe'ejin isen. ²⁷ Tusa tetsa_ra kjuanima yojona 'ba tetsa'aan nga kjuint'e mé= xi an mejenna. Tsa chjen, jaskan nga je kitsikja'axtiuya_ra xuta xi yak'a, bi kua'e'ndenaga kuangatsangaa chuya ko an.

10

¹ Jun nts'ia, bi mejenna nga sichiyajiun jó kuánre xuta chingana nixtjin kuatse jan. Nga ngatsi'i kitsjen ngi yufi xi yaku ndiyare 'ba ja'axtiu ndachikun. ² 'Ba 'batsa'en ngatsi'i kuajngukoni Moisés nga kisatendajin yufi ko ndachikun.

³ 'Ba ndekuini xichine kiskinetsi'i xi kitsjare Na'enchana. ⁴ 'Ba ndekui nanda kits'ini ngatsi'i xi kitsjare Na'enchana. Ngat'a ngatsi'i kits'i nanda xi 'etjure naxi xi kitsjare Na'enchana, naxi xi kitsjenko. 'Ba kui naxibiu Cristo= nini. ⁵ Ninga 'batsa'en, Na'enchana bi kuatsjare ngat'are nkjin xutabiu, kui kjua tuchuña= kis'enduni mik'en nga'nde t'axin.

⁶ Ngayéje kibi kuán tuxi s'ejñanina joni jngu kjuakusun ngat'ana, tuxi bi simejénña xi ch'o, jotsa'en kitsimején xutabiu. ⁷ Ninga bi nichji ru na'en xi ntsja xuta mandani jo kitsa'en yak'a xutabiu. Jotsa'en kua'indut'a enre Na'enchana: "Xuta tsik'endu 'ba kiskine 'ba kits'i, 'ba sa'e tsisetjen nga kitsitsjare yojore." ⁸ Bi siskakua yojona jo kitsa'en yak'a xutabiu, 'ba kui= kjua jesunni kanján mi nga tu jngu nixtjin sa. ⁹ Ninga bi xut'ayakua Na'enchana jo kitsa'en yak'a xutabiu, 'ba kui= kjua kiskinenire tjiuye 'ba jesun. ¹⁰ 'Ba ninga bi tsujeto'on Na'enchana jo kitsa'en yak'a xutabiu, 'ba kui= kjua ankje xi batexumare kjuabeyo kitsik'enni.

¹¹ Ngayéje kibi xi kuánre xuta chingana, kui xi kis'ejña kusunna. 'Ba enre Na'enchana kua'indut'a kibi, tuxi kuaku ndiyanina ña xi tetsuba nixtjin xi je mején kjuet'a.

¹² 'Bamani, xi tsikja'etsjen nga nda kixi sejña, ngatakutsejenre yojore, tuxi bi skajinni ndekuini je. ¹³ Xi kjima ngat'a tsojon nga tichut'ayakonu bi ngisa ts'axtiu ngisa nga ko mare mé= xi kjima ngat'are xuta xi yak'a. Tsik'etjusun= mé= xi nchja Na'enchana 'ba bi sja'nde tsa ngisa 'ñu xut'ayakonu nga ko mare mé= xi kuan

xukjuakonu. Tusa sja ndiyanu jótsa'en k'uetju nga xut'ayakonu, tuxi xukjuakoninu mé= xi kjua'enio.

¹⁴ 'Bamani tsu'ba, jun nts'ia xi tsimején_nuu, tisent'axin_ru jo tsa'en xuta nga tsichjire na'en xi ntsja xuta mandani. ¹⁵ Tefako_nuu joni xuta xi be mé= xi tsa'en. Nde jun= tikja'etsjenñu tsa kjuakixi mé= xi texin_nuu. ¹⁶ Kionga 'yáa binu tsje nga ba'e_ra kjuanda Na'enchana, ¿a bi jngu yojo maña ko Cristo ngat'a tse'e jinre? 'Ba kionga china niñuxtila xi bakjanya_ra xingia, ¿a bi jngu yojo maña ko Cristo ngat'a tse'e yojore? ¹⁷ Tu jngu= ma sani niñuxtilo. Kui kjua tu jngu yojo maña, ninga nkjin maña ña. Ngat'a tu jngu niñuxtila china.

¹⁸ Chutsejen'a chuyo xuta xi tse'e Israel. Xi kjine yojore tjiuba xi ba'ere chje Na'enchana, ¿a bi tu jngu yojo ma ngat'a tse'e chje xi ba'ere Na'enchana, xi s'endusun altar? ¹⁹ Nga 'bi texian, bi texian nga chjire na'en xi ntsja xuta mandani, ninga yojo xi ba'ere joni chje. ²⁰ Tusa kui= xi texian. Chje xi tsja xuta xi tjin ngasun'ndio, isennixtjin xi tsa'exat'are chanayiu tsjare 'ba bi Na'enchana. 'Ba bi mejénna an nga jngu kuon ko isennixtjinbiu. ²¹ Bi kuan s'iuyo vasore Na'enchana 'ba ko vasore isennixtjin xi tsa'exat'are chanayiu. Bi kuan xinet'o yamixare Na'enchana 'ba ko yamixare isennixtjinbiu ngayeje. ²² Tsa si'on kibi, tsunire nga mejénnu nga kuastire Na'enchana. ¿A nikja'etsjenñu nga ngisa tjinna kjua'ñu ña nga ko mare Na'enchana?

²³ “Ma= tsa'aan tume tsajminu”, tsu xuta. 'Ba= tjin tsakaiñu, tunga bi ngayéje kjenndiya. “Ma= tsa'aan tume tsajminu”, tsu xuta. 'Ba= tjin

tsakaiñu, tunga bi ngayéje tsja nga'ñuna. ²⁴ Ni'yá ngatamangisjai xi tu kjuanda tse'e, tusa ngatamangisjai kjuandare xuta xi yak'a.

²⁵ Kuan xino tume yojo xi sateña 'ba bi nikja'etsjion tsa kui xi ch'otsa'en k'uejña kjuafa'etsjennu. ²⁶ Ngat'a ngayéje ngasun'ndio ko ngayéje xi kio tjin, tse'e= Na'enchana.

²⁷ Tsa jngu xi bi makjainre ngat'a tse'e Na'enchana sikjint'enu nga kuangin chino niñu ndaba 'ba mejénnú kuangiun, chino tume xi kueyanu 'ba bi nikja'etsjion tsa kui xi ch'otsa'en k'uejña kjuafa'etsjennu. ²⁸ Tunga tsa tjin xi kuetsunu: “Na'en xi ntsja xuta= kuandani kitsa'ere joni chje yojobi”, bi chino. T'echjon_ru yojonu tu ngat'are xi 'ba kitsunu 'ba tu ngat'are kjuafa'etsjenre. ²⁹ Ngat'are kjuafa'etsjenre xi 'ba tsu tenchjaa, bi ngat'are kjuafa'etsjennu. ¿Ánñu jo tsu kjuafa'etsjenre xuta xi kja'ere k'uechja'ndenire mé= xi ma tsa'aan? ³⁰ Tsa tsja_ra kjuanda Na'enchana ngat'are xi kjiniä, ¿ánñu kuetsuni xuta nga bi nda tjin nga skinaa tsajmibiu kionga je kitsja_ra kjuanda Na'enchana?

³¹ 'Bamani, tsa xino asa s'iu asa si'on tume tsajminu, 'ba ti'on tuxi s'ejñatsejenni kjuajere Na'enchana. ³² Bi 'bejña_ru kjuana'en xuta judío ninga xi bi judío ninga xi makjainre ngat'a tse'e Na'enchana. ³³ Joni an, tume xi tsa'aan, tsa'en=ña mé= xi matsjare ngatsi'i xuta. Bi tu kjuanda tsa'an mangisjaa, tusa kjuandare xi yak'a, tuxi k'uangini.

11

¹ Chjunginuu jotsa'en kjengi_ra Cristo.

2 Nda 'baxje_nuu nts'ia, ngat'a ngantsjai fa'etsjennu ngat'ana 'ba ngat'a 'bejñatjo xi yakuya_nuu, mé= xi kitsa'ena 'ba kitsikja'axtiuya_nuu. 3 Tunga mejénna nga nda ngatas'ejinnu nga Cristo, kui xi ngakure nga jngu jngu xuta xi'in. 'Ba xi xi'in kuán, kui xi ngakure chjunre. 'Ba Na'enchana, kui xi ngakure Cristo. 4 Tu'ya xuta xi'inñu xi kue'mo nindaku nga kjuako Na'enchana asa nga sikja'axtiuya en xi tsjare Na'enchana, kui xi bi tjibekun xi ngakure. 5 Tunga tu'ya chjunñu xi bi kue'mo nindaku nga kjuako Na'enchana asa nga sikja'axtiuya en xi tsjare Na'enchana, kui chjunbiu bi tjibekun xi ngakure ngat'a jo=ni tsa kis'ejunre kui. 6 Ngat'a tsa jngu chjun bi kue'mo nindaku, tusa ngatate ntsjare. 'Ba tsa kjuasuba nga kuate ntsjare asa nga k'uejunre yojore, ngu, ngate'mo nindaku.

7 Xi xuta xi'in kuán bi tjinnere nga kue'mo nindaku. Ngat'a kui= xi isenre Na'enchana 'ba kui xi bakutsejen kjuajere Na'enchana. Tunga xi chjun kuán, kui xi bakutsejen kjuajere xi xi'in kuán. 8 Ngat'a xuta xi'in xi titjun bi yojore chjun jendibani. Tusa chjun xi titjun yojore xuta xi'in jendibani. 9 'Ba bi kjuanda tse'e chjun kuanda xuta xi'in. Tusa chjun kuanda tu kjuanda tse'e xuta xi'in. 10 Kui kjuañu tjinnenire kue'moni nindaku xi chjun kuán, tuxi kuakuni nga tjin xi batexumare. 'Ba ngatatsa'en tu ngat'are ankjele xi tjin.

11 Tunga ngajinna ña xi makjainna ngat'a tse'e Na'enna Jesucristo, xi xi'in bi tijñat'axinre xi chjun, 'ba xi chjun bi tijñat'axinre xi xi'in. 12 Ngat'a

jotsa'en nga chjun xi titjun jendibanire yojore xuta xi'in, 'ba=nde tsa'en nganda'e xi'in tsinnire xi chjun kuán. 'Ba ngayéje xi tjin Na'enchana ndibanire.

¹³ Jun suba chusun ru ngat'are kibi. ¿A nda= tjin kionga jngu chjun kjuako Na'enchana nga bi kue'mo nindaku? ¹⁴ Jo tjin nga'e ngasun'ndio, ¿a bi 'yare nga jngu kjuasuba nga xuta xi'in sinduju ntsjare? ¹⁵ Tunga ngat'are jngu chjun, nda= bakure nga nduju kuan ntsjare, ngat'a kui xi kitsa'ere nga nduju kuan ntsjare, tuxi kue'moni nindaku.

¹⁶ Tunga tsa tjin xi bi tijjngu kakun ngat'are kibi, ngatjabe nga bi kja'e tsa'en ña'an ngisai ninga xuta xi yak'a xi makjainre ngat'a tse'e Na'enchana.

¹⁷ 'Ba xi xin ngisa nuu, bi nda 'baxje nuu. Ngat'a kioxu nga mañojon, tusaxu ngisa ma xi ch'o nga ko mare xi nda. ¹⁸ 'Ba xi tjun xin_nuu nijmi xi tji'benā nga bakjanyaxu xingiu nga mañojon gaya ningu. 'Ba tjin= tsajmi xi makjainna ngat'are kibi. ¹⁹ Kjuakixi= nga machjen nga kuakjanyo xingiu, tuxi xiaña 'yá= xi kixi sejña ngixkun Na'enchana.

²⁰ Kionga mañojon, bi 'ba teño'on jotsa'en yakuyana Na'enna Jesucristo nga tsakjenko jñu xutare. ²¹ Ngat'a kioxu nga bechiu, nga jngu jngu xi tjin ngajinnu ja kjebe ja kjebe xu nga kjine xi tse'e. 'Ba tjinxu xi bi sakure xichine 'ba tjinxu xi mach'i. ²² ¿A tsajainnu ni'ya ña kuan xino 'ba s'iu? ¿Áññu joni tsajmi xi tumé chjire teniko=ñu ningure Na'enchana 'ba teba'e ru kjuasuba xuta xi tumé tjinre? ¿Jó xin_nuu? ¿A nda= k'uaxjenu? Bi nda k'uaxjenu ngat'are kibi.

²³ Ngat'a Na'enna Jesucristo yakuyana kibi, 'ba kui xi kitsikja'axtiuya ngani_nuu. Ndekuini nistjen nga kjiningantsja, kiskjebe niñuxtila. ²⁴ 'Ba kionga je= kitsjare kjuanda Na'enchana, yakjanya niñuxtilo 'ba 'bi kitsu: “Kibi= yojona xi singantsjaa tu kjuanda tsojon. 'Ba ti'on tuxi kjua'etsjenninu ngat'ana.” ²⁵ 'Ba kionga je kiskine xichine, 'ba nde kiskjebe chutsiun, 'ba 'bi kitsu: “Kui= chutsinbiu xi tibakutsejen kjua xatse xi ti'bendakonu Na'enchana. Ngat'are jinna tis'endakoni kjuabiu. 'Ba ti'on tuxi kjua'etsjenninu ngat'ana ngantsjai nga s'iu.” ²⁶ 'Bamani, jotjin ndiya nga xino niñuxtilo 'ba s'iu chutsiun, te'beñu nijmi ngat'are kjuabeyare Na'enna ka'nda nga kjua'e ngani.

²⁷ Ngu, tu'yañu xi bi skuekun nga skine niñuxtilo 'ba nga k'uiya chutsinre Na'enna, kui xi majngije ngat'are yojore ko jinre. ²⁸ 'Bamani, nga jngu jngu xuta tjinnere nga sinkjinre kjuafa'etsjenre tsa tsje tjin, kionga kje kjinejin niñuxtilo 'ba nga kje 'biyaá chutsiun. ²⁹ Ngat'a tsa tjin xi tuchuba skine 'ba tuchuba k'ui nga bi skuekun nga yojore Na'enna kibi, kui xi tikanine tajngure je yojore jotsa'en tikjine 'ba tji'bi. ³⁰ Kui= kjuañu tjinni ngajinnu nkjin xi sefesun 'ba xi inda tjinre, 'ba je jesun masen. ³¹ Tunga tsa tjunda sinkjin_ra kjuafa'etsjenna, bi si'anna kjua. ³² Tunga kionga Na'enna Jesucristo tsa'enna kjua, kui baku ndiyana xi kjuakixi, tuxi bi chajaña nga si'ankona kjua xuta xi tjin ngasun'ndio.

³³ 'Bamani nts'ia, nga kuañojon nga kuechui, chuya_ru xingiu. ³⁴ Tsa tjin xi 'ñu bojore, ngatakjen ndaba, tuxi bi xaninejeninu kionga kuañajanko

xingiu. 'Ba ngat'are kjuā xi tjin ngisa ngajinnu, kio= k'uendajian nga kjuikun_nuu.

12

¹ 'Ba nganda'e, nts'ia, mejénna nga xio xi kjuakixi ngat'are nkjin kuya kjuanda xi tsjana Isennix-tjintsjere Na'enchana.

² 'Yañu jó kjiñ'o on nga kje makjainnu Na'enna. Joni tsa kichjufenu nga tsangitjengiu na'en xi bi mare nchja, xi ntsja xuta kuandani. ³ 'Bamani, xin_nuu nga tu'yá xi Isennixtjintsjere Na'enchana titsikinchja ma nchja bojore Jesús. 'Ba nde ni'yá ma tsu: “¡Jesús xi Na'enna!”, tsa bi Isennix-tjintsjere Na'enchana tijñajin inimare.

⁴ Ja kja'e ja kja'e kjuanda xi kitsa'ena, tunga tu jngu= ma sani Isennixtjintsjere Na'enchana xi tsjana kibiū. ⁵ Ja kja'e ja kja'e tsa'en ña'axat'a_ra xingia xi makjainna ngat'a tse'e Na'enna, tunga tu jngu= ma sani Na'enna Jesús xi tsja xana. ⁶ 'Ba ja kja'e ja kja'e xa xi Na'enchana tsa'en ngajinna ngatsi'a, tunga tu jngu Na'enchana xi tsa'en ngayéje kibiū.

⁷ 'Ba nga jngua jngua kitsa'ena mé= xi bakutsejen Isennixtjintsjere nga tu kjuanda tsajan ngatsi'a. ⁸ Ngat'are Isennixtjintsjere Na'enchana, tjin xi ba'ere kjuanda nga kuinchja en xi tse kjuankjin kakun tjinre, 'ba ngat'are ndekuini Isennixtjiun, tjin xi ba'ere kjuanda nga kuetsuya jó tsunire xi tjin. ⁹ Tjin xi ndekuini Isennixtjiun tsjare kjuanda nga ngisa nda kuakjainre, 'ba tjin xi ndekuini Isennixtjiun tsjare kjuanda nga kuanre sinda xuta. ¹⁰ Tjin xi mare tsa'en kjuakun, 'ba tjin xi mare tsikja'axtiuya en xi Na'enchana

tsjare. 'Ba tjin xi mankjnre tsa kjuakixi nga Isennixtjintsjere Na'enchana tijña ngajinre xuta asa isennixtjin xi bi nda. Tjin xi mare nchja kja'e kjuanga en, 'ba tjin xi tsuya jó tsunire enbiu.

¹¹ Tunga ngayéje kibi jngu sani 'ba ndekuini Isennixtjintsjere Na'enchana xi tsa'exajinna, 'ba kui xi tsjare kjuanda nga jngu jngu xuta jotsa'en nga Kui mejénre sjare.

¹² Joni yojona. Jngu mani, tunga nkjin= ka'a tjinre. 'Ba ngatsi'i ka'a xi tjinre, ninga nkjin ka'a mani tu jngu yojo ma sani. 'Ba nde 'ba= tsa'ennire ngat'are Cristo. ¹³ Ngat'a tu jngu Isennixtjintsje kisatendaña ngatsi'a 'ba 'ba=tsa'en tu jngu yojo kuánña, ninga xuta judío asa kja'e xuta, ninga xi chu'nda asa xi ndaire yojore. Ngatsi'a kika'ena nga kji'yaa ndekuini Isennixtjintsje.

¹⁴ Jngu yojore xuta nkjin= ka'a tjinre, bi tu jngu= mani. ¹⁵ Tsa jngu ndsakua kuetsu: “Bi jngu ka'a tse'e yojo kuáan, ngat'a bi ntsja kuáan”, tsa 'ba kuetsu, ¿a tu kui= kjua bi nde tse'e yojo kuanni?

¹⁶ 'Ba tsa jngu ñajan kuetsu: “Bi jngu ka'a tse'e yojo kuáan, ngat'a bi xkun kuáan”, tsa 'ba kuetsu, ¿a tu kui= kjua bi nde tse'e yojo kuanni? ¹⁷ Tsa yojona tu jngu xkuan kuán sa, ¿jót'sa'en kuan kjuinu'yaña? 'Ba tsa yojona tu jngu ñajan kuán sa, ¿jót'sa'en kuan xujenña?

¹⁸ Tunga Na'enchana kitsa'en yojona ko nkjin ka'a 'ba'endu xki ka'a ña kuamejénre kui. ¹⁹ Ngat'a tsa tu ngusun ngayéje ka'a, bi s'e yojo. ²⁰ Kui kjuañu ninga nkjin ka'a mani, tunga tu jngu= yojo.

²¹ 'Ba tuxkuan bi ma tsure ndsa: “Bi machjenra.” Ninga nindakua bi ma tsure ndsakua: “Bi machjenra.” ²² Tusa xki ka'a yojona xi mana joni

tsa bi 'ñu tjinre nga'ñu, kui xi ngisa 'ñu machjen ngisa. ²³ 'Ba xki ka'a yojona xi mana nga bi 'ñu chjire, kui xi ngisa nda nikuenda. 'Ba xki ka'a yojona xi bi mejenna nga xiare, kui= xi ngisa nik'ejña'ma. ²⁴ 'Ba xi ma 'yare, bi machjen nga 'ba sikua. Tunga Na'enchana 'ba=tsa'en 'enda yojona, nga ngisa nda sikuenda ka'are yojona xi mana nga bi 'ñu chjire. ²⁵ 'Ba= kitsa'en Na'enchana, tuxi bi kuan jó ya s'eni xki ka'a xi tjinre yojona, tusa ngusun tsa'en ngatsikuendakaña xinkjin. ²⁶ Tsa jngu ka'a yojona on tjimare, 'ba=nde on tjimare xi yak'a. 'Ba tsa jngu ka'a yojona 'ñu nda tji'naxje, 'ba=nde ngatsi'i xi yak'a tsja kjimare.

²⁷ Ngu ngatsi'u yojore Cristo kuon, 'ba nga jngu jnguu xki ka'are yojobiu kuon. ²⁸ Ngajinre xuta xi makjainre ngat'a tse'e Na'enna Jesucristo, Na'enchana ja'ajin apóstoles joni xi titjun, xi majóni profeta xi tsikja'axtiuya en xi Na'enchana tsjare, xi majánni maestru, 'ba sa'e xi mare tsa'en kjuakun, 'ba xi mare tsinda xuta, 'ba xi be jótsa'en kuaseko xuta, 'ba xi be jótsa'en sa'en nga sa'exastin xuta, 'ba xi mare nchja kja'e kjuanga en xi tsjare Na'enchana.

²⁹ Bi ngatsi'i xi makjainre ngat'a tse'e Na'enna Jesucristo apóstoles kuán, bi ngatsi'i xi profeta, bi ngatsi'i xi maestru, 'ba bi ngatsi'i xi mare tsa'en kjuakun. ³⁰ Bi ngatsi'i kitsa'ere kjuanda nga kuanre sinda xuta, bi ngatsi'i kitsa'ere kjuanda nga kuanre kuinchja kja'e kjuanga en, 'ba bi ngatsi'i mare tsuya jó tsunire en xi Na'enchana tsjare xuta. ³¹ Tunga ngajinre ngayéje kjuanda xi tsjana Isennixtjintsjere Na'enchana, timijon xi

ngisa nda kuasekore xuta.

Tunga an kuakun_nuu jngu ndiya xi ngisa nda tjin.

13

¹ Tsa nchja nkjin kuya en xi mare xuta 'ba ko en xi nchja ankjele, tunga tsa bi tsimijaan xi yak'a, an jo=ni jngu tsajmi xi tu fane asa jngu tsajmi xi ch'otsa'en nu'yare nga nikjane. ² 'Ba tsa mana nikja'axtiuya enre Na'enchana joni jngu profeta, asa mankjinna ngayéje xi 'mo 'ejña Na'enchana, asa 'biā ngat'are ngayéje xi tjin, asa nda makjainna ngat'a tse'e Na'enchana nga ka'nda kuanna xin sikasen jngu nindu, tunga tsa bi tsimijaan xi yak'a, tumé chji_rā. ³ 'Ba tsa sja_rā xuta nima ngayéje xi tjinna, 'ba ka'nda singantsjaa yojona tuxi kuitini tu kjuanda tse'e xuta xi yak'a, tunga tsa bi tsimijaan xi yak'a, tumé chjire kibiū.

⁴ Xi tjinre kjuanimejen, kui xi tjinre kjuatsejnda 'ba nda xuta. Xi tjinre kjuanimejen bi xin kakun, bi nchja en nk'a kakun, bi nk'a 'baxje yojore, ⁵ bi ch'o tsa'en ko xi yak'a, bi mangisjai xi tu kjuanda tse'e tajngu, bi ta'a makjanre, bi 'bejin kakun nga ch'o kuata'en, ⁶ bi tsja s'ere ngat'are mé= xi bi kixi tsa'en xuta. Tusa matsjare ngat'are xi kjuakixi. ⁷ Xi tjinre kjuanimejen bi tsikjere kakun, bi tsichaja kjuamakjainre, tusa kuyantsjai, 'ba chukjuakore tumeñu.

⁸ Kjuanimejen niñajanni kjuet'a. Kjua'e nixtjin nga bi nde s'enire kjuanda xuta nga sikja'axtiuya enre Na'enchana joni profeta, ninga nga kuinchja kja'e kjuanga en, ninga nga kuankjinre jó tsunire xi tjin. ⁹ Ngat'a tu chuba sani xi mankjinna

nganda'e, 'ba tu ichi sani xi nikja'axtiuya ngat'are Na'enchana nganda'e. ¹⁰ Tunga kionga kju'a'e xi kjuakixi kjin, kio= kjue xi tu ichi 'yasa nganda'e.

¹¹ Kionga ki'ndia, kinchjaa jotsa'en nchja jngu ki'ndi chi, 'ba kitsikja'etsjan jotsa'en tsikja'etsjen jngu ki'ndi chi, 'ba kuankjinna jotsa'en mankinre jngu ki'ndi chi. Tunga kionga je kuachinga, 'ejñat'axian kjuaki'ndina. ¹² Nganda'e tu xa= tji-matsejenna joni tsa jngu chutsin techutsejenya. Tunga kju'a'e nixtjin nga nda xia. Nganda'e tu chuba mankinna. Tunga kju'a'e nixtjin nga nda kuankjinna, jofatsa'en bena Na'enchana.

¹³ Ngaján kibi niñajanni kjuet'a: nga makjainna ngat'a tse'e Na'enchana, nga chuya_ra xi sjana, 'ba nga s'ena kjuanimejen. 'Ba ngajinre ngaján, kjuanimijon xi ngisa chjire.

14

¹ T'e_ru kakun nga ngisa simején ngiso xi yak'a 'ba nde timijon nkjin kuya kjuanda xi tsjana Isen-nixtjintsjere Na'enchana. Tunga ngisa timijon nga sikja'axtiuyo en xi Na'enchana tsja. ² Ngat'a xi kitsa'ere kjuanda nga kuinchja en xi kja'ere, tu Na'enchana sani fako, bi xuta. Ngat'a Isennix-tjintsjere Na'enchana ndibanire mé= xi nchja, 'ba tu'yá be jó tsunire xi nchja. ³ Tunga xi kitsa'ere kjuanda nga tsikja'axtiuya en xi Na'enchana tsjare, kui xi fako xuta, tuxi sja nga'ñunire, si'ñu kakunni 'ba tsitsja kakun. ⁴ Xi nchja en xi tu'yá mankinre ndekui tsjanga'ñu tajngunire yojore. Tunga xi tsikja'axtiuya en xi Na'enchana tsjare, kui xi tsja nga'ñure xi makjainre ngat'a tse'e Na'enna.

5 Mejénna tsakaiñu nga ngatsi'u kua'enu kjuanda nga kjuinukjuo kja'e kjuanga en, tunga ngisa mejénna tsa kua'enu kjuanda nga sikja'axtiuyo en xi Na'enchana tsja. Ngat'a ngisa= chjire enbiu nga ko mare en xi tu'yá mankjínre. Tunga nda= tjin tsa kuinchja en xi tu'yá mankjínre tsa kuetsuyara, tuxi 'batsa'en saku nga'ñunire xi makjainre ngat'a tse'e Na'enna.

6 'Bamani nts'ia, tsa kjuikun_nuu 'ba kjuako_nuu en xi tu'yá mankjínre, tsa 'ba sa'aan, ¿a kuaseko_nuu? ¿A bi ngisa nda tjin nga xin_nuu mé= xi 'bejñatsejen Na'enchana, asa xin_nuu mé= xi mankjínna, asa sikja'axtiuya_nuu en xi Na'enchana tsja, asa kuakuya_nuu mé= xi kitsa'ena? 7 Ka'nda tsajmi xi tsajainre jnda tunga fane joni tjio asa najni, tsa bi nda kjuinikjane, ¿jó tsa'en xiaña ñáre son xi tjinikjane? 8 'Ba tsa bi nda kjuinikjane tjio, ¿a k'uendunda= chasoldadu nga kuekjan? 9 'Ba nde 'ba= mani ngajinnu. Tsa kuixun en xi tu'yá kuankjinre, ¿jótsa'en kuankjinnire xuta mé= xi kjuinukjuo? 'Ba jo=ni tsa tu kjuinukjuajin ision.

10 Kjuakixi= nga nkjin en tjin ngasun'ndio 'ba ngayéje 'ñu= chjire ngat'are xi mankjínre. 11 Tunga tsa bi mankjínna en xi tifakona jngu xuta, ngu kuan_ra joni jngu xuta xi bi tse'e nangire, 'ba an kuanna xutabiu joni jngu xuta xi xin nangire. 12 Ngu, mé= jun tsu'ba, mejénnú nga s'enu nkjin kuya kjuanda xi tsjana Isennixtjintsjere Na'enchana, chjo'o kjuanda nga kuannu kua'e nga'ñu_ru xi makjainre ngat'a tse'e Na'enna.

13 'Bamani, xi nchja en xi tu'yá mankjínre,

ngat'are Na'enchana, tuxi ku'anire kuetsuya jó tsunire en xi nchja. ¹⁴ Ngat'a tsa kuinchjaa en xi tu'yá mankjínre nga kjuakua Na'enchana, tu inimana= fako Na'enchana tunga kjuafa'etsjenna bi fa'as'enjinre. ¹⁵ Bamani, ¿mé= xi tjinnere sa'aan ya'a? Ngu sa'aan ngojó. Kjuakua Na'enchana ko inimana, tunga 'ba nde kjuakua ko en xi mankjínna ngayeje. Sia ko inimana, tunga 'ba nde sia ko en xi mankjínna ngayeje. ¹⁶ Ngat'a tsa tu ko inimari sa tenichji_ri Na'enchana, 'ba tsa tibasen ñojonri jngu xi bi be mé= xi teñe'en, ¿jót'sa'en tu jngu sa'enkori yojore nga sjare kjuanda Na'enchana, kionga bi tjimankjinre mé= xi tesji? ¹⁷ Kjuakixi= nga nda teba'e_ri kjuanda Na'enchana nga 'ba teñe'en, tunga bi tisaku nga'ñure xuta xi yak'a.

¹⁸ Tsja_ra kjuanda Na'enchana nga ngisa nchja ngisaa kja'e en xi Kui tsjana nga ko mare jun. ¹⁹ Tunga nga mañajan xi makjainre ngat'a tse'e Na'enna, ngisa= ndani tu ón sa ndsu'baa en kuinchjaa xi kuankjinre xuta nga ko mare te mi en xi tu'yá kuankjinre, ngat'a en xi kuankjinre, kui= xi kuasekore xuta.

²⁰ Nts'ia, bi nikja'etsjion joni ki'ndi nisti. Ngatjamo joni ki'ndi nisti ngat'a tse'e kjuach'o, tunga tikja'etsjion jotsa'en tsikja'etsjen xuta chinga.

²¹ Ngat'a 'ba=tsa'en kua'indut'a kjuatexumo: “Kja'e en 'ba xuta xi xin nangire sichjian nga kjuakua naxinandabi. Tunga ninga tsa 'ba sa'aan, bi kuasen ñojonna, kitsu Na'enchana.” ²² Bamani, en xi kja'e kjuanga nchja xuta, kui xi bakutsejen kjuañure Na'enchana nga tu kjuanda tse'e xuta xi bi makjainre ngat'a tse'e kui 'ba bi kjuanda tse'e

xi je makjainre. Tunga en xi Na'enchana tsja xi tsikja'axtiuya xuta, kui xi tu kjuanda tse'e xuta xi je makjainre 'ba bi kjuanda tse'e xi bi makjainre.

²³ 'Ba 'batsa'en tsa jngu nga'nde kuañojon ngatsi'u xi makjainre ngat'a tse'e Na'enna 'ba tsa ngatsi'u kjuinukjuo en xi tu'yá mankjainre, 'ba kjua'as'en kio xuta xi bi be mé= xi teño'on asa xuta xi bi makjainre ngat'a tse'e Na'enna, ¿a bi kuetsu nga skanu? ²⁴ Tunga tsa ngatsi'u tenikja'axtiuyo en xi Na'enchana tsjana, 'ba kjua'as'en kio xuta xi bi makjainre ngat'a tse'e Na'enna asa xi bi be mé= xi teño'on, kionga kjuint'e ngayéje xi temixun, kio skue nga tjinre je 'ba kuanejere ngayéje xi temixun. ²⁵ Nga tibasen ñojon, s'ejñatsejen mé= xi tjinndujin'mo inimare, 'ba kuasenkunch'in nga sichjire Na'enchana, 'ba sikixiya nga kjuakixi nga Na'enchana tijñajin ngajinnu.

²⁶ 'Ba 'batsa'en, ¿mé= xi tjinnere si'an, nts'ia? Kionga kuañajan tsi'u, tjin xi ngatjase jngu salmo, tjin xi ngatakuyare xuta xi yak'a, tjin xi ngatatsuya mé= xi 'bejñatsejen Na'enchana, tjin xi ngatanchja kja'e kjuanga en, 'ba tjin xi ngatatsuya jó tsunire ion. Ngayéje xi si'on nga jngu jnguu, ti'on tuxi kua'e nga'ñuni_ru xi makjainre ngat'a tse'e Na'enna. ²⁷ 'Ba tsa tjin xi kuinchja en xi tu'yá mankjainre, jó asa ka'nda ján ngatjama. Tunga jngu ngatjama sa nga kuinchja, 'ba jngu xi ngatatsuya jó tsunire ion. ²⁸ 'Ba tsa tsajain xi mare tsuya jó tsunire ion, tusa xi mare nchja en xi tu'yá mankjainre xiu ngat'ejña ngaya ninga 'ba ngatjako tajngu yojore ko Na'enchana.

²⁹ 'Ba ngat'are xi tsikja'axtiuya en xi Na'enchana

tsja, jó asa ján ngatjama. 'Ba xuta xi yak'a ngatatsikja'etsjen jó tsunire en xi inyant'e.
³⁰ 'Ba nga tinchja jngu xuta, tsa ngijngu xi kio tijña k'uejñatsejenre Na'enchana jngu en, ngatatsja'ndere xi tjun tinchja tsakaiñu. ³¹ 'Ba 'bi=tsa'en nga jngu jnguu jun sik'ako_ru xingiu nga sikja'axtiuyo en xi Na'enchana tsja, tuxi ngatsi'u kuanninu 'ba sakunu kjua'ñukakun.
³² Xi tjinre kjuanda nga tsikja'axtiuya en xi Na'enchana tsja ma batexumare kjuandabiu 'ba ma kuya chubā nga kuinchja. ³³ Ngat'a Na'enchana bi mejénre kjuasi, tusa mejénre nga s'e kjuaxiu.

Jo ma ngajinre xi makjainre ngat'a tse'e Na'enna Jesucristo, ³⁴ xi yanchjin tjinnere nga xiu k'uendu ngaya ningu. Ngat'a bi tixa'ndere nga kuinchja. Tusa tjinnere nga ngisa ngi'nde kueko yojore, jo tsu kjuatexumo. ³⁵ 'Ba tsa tjin xi mejénre nga kuankjinre, ndaba ngatjamingiyare xi'inre. Ngat'a bi nda tjin tsa jngun kuinchja ngajinre xuta xi tjindu ningu.

³⁶ ¿A nikja'etsjenñu nga ngajinnu 'etuts'inre nga kis'eya nijmi enre Na'enchana? ¿A tu jun= xi texuntsjo ion? ³⁷ Tsa tjin xi mare nga kui xi tsikja'axtiuya en xi Na'enchana tsja asa tisakure jngu kjuanda xi tsja Isennixtjintsjere Na'enchana, kui xi tjinnere nga sikixiya nga kjuatexumare Na'enchana xi tetsi'indu_nuu nga'e. ³⁸ 'Ba tsa tjin xi bi kuatesinre xi tetsi'indu_nuu nga'e, 'ba nde bi satesinre kui ngayeje.

³⁹ 'Bamani nts'ia, timijon nga sikja'axtiuyo en xi Na'enchana tsja 'ba bi 'bechja'nde_ru xi kuinchja

kja'e kjuanga en. ⁴⁰ Tunga ngayéje xi si'on, nda ti'on 'ba kixi kixi tangiko.

15

¹ 'Ba nganda'e nts'ia, mejénna sikja'etsjenya_nuu en ndare Na'enchana xi ja'ba kitsikja'axtiuya_nuu, xi kuakjainnu 'ba xi kixi tenyajiun nganda'e. ² 'Ba Ngat'are= kui k'uangi=ñu tsa nda k'uejñatjo en xi kitsikja'axtiuya_nuu, tsa bi 'ba si'on tu kjuatjo= kuakjainnu.

³ Je kitsikja'axtiuya_nuu en xi ngisa tjun tijña xi ja'axtiuyana nga Cristo k'enntjai ngat'are jena jotsa'en kua'indut'a enre Na'enchana, ⁴ 'ba nga kis'eyanijin, 'ba nga xi majánni nixtjin ja'aya nganire ngajinre mik'en jotsa'en kua'indut'a enre Na'enchana, ⁵ 'ba nga yakutsejenre yojore Pedro 'ba jaskan xi tejó. ⁶ 'Ba jaskan yakutsejenre yojore ts'axtiu ón sientu nts'ia. Nkjin mani xi tjindu ngisa, 'ba yak'a je jesun. ⁷ 'Ba 'ba nde tsa'en yakutsejenre yojore Santiago 'ba jaskan ngatsi'i nchja chinga apóstol.

⁸ 'Ba xi fet'ani yakutsejenna yojore an xi joni jngu ki'ndi xi tsején. ⁹ Ngu an xi ngisa bi 'ñu chjire ngajinre nchja chinga apóstol 'ba bi bakinna nga apóstol k'uinna, ngat'a kitsjengi=ñā xi mak-jainre ngat'a tse'e Na'enna Jesucristo. ¹⁰ Tunga tu ngat'are kjuandare Na'enchana= nini kuán=ñā 'yá xi kuáan nganda'e. 'Ba bi tu tifton kjuanda xi kitsjana Na'enchana. Tusa ngisa 'ñu tetsa'exa ngisaa nga ko mare nchja chinga apóstol xi yak'a. Tunga bi an xi 'ba tetsa'aan, tusa kjuandare Na'enchana xi tijñajinna. ¹¹ 'Ba 'batsa'en tsa an

xi kitsikja'axtiuyaa asa nchja chinga apóstol xi yak'a; tunga xi ngisa chjire kui nga 'batsa'en kjinikja'axtiuyee, 'ba jun 'ba=tsa'en kuakjainnu.

¹² Tsa tifa'axtiuya nga ja'aya nganire Cristo ngajinre mik'en, ¿jót'sa'en nga tjin xi tsu ngajinnu nga bi kjua'ayare mik'en? ¹³ Ngat'a tsa bi kjua'ayare mik'en, 'ba nde Cristo bi ja'ayare ngajinre mik'en ngayeje. ¹⁴ 'Ba tsa bi ja'ayare Cristo ngajinre mik'en, tsu=nire nga tumé chjire en xi tenikja'axtiuyee 'ba nga tumé chjire nga makjainnu. ¹⁵ Tsa 'ba tjin, jin jín xi tsu en ndesu ngat'a tse'e Na'enchana, ngat'a tenikixiyani nga Na'enchana kitsikja'aya nganire Cristo ngajinre mik'en. Tsa kjuakixi nga bi kjua'aya nganire xuta ngajinre mik'en, tsu=nire nga ninga Cristo bi kjuakixi nga ja'ayare ngayeje. ¹⁶ Ngat'a tsa bi kjua'aya nganire mik'en, ninga Cristo bi ja'ayare ngayeje. ¹⁷ 'Ba tsa bi ja'ayare Cristo ngajinre mik'en, tumé chjire nga makjainnu. 'Ba tojo tet-subajinjün jenu. ¹⁸ 'Ba jín nde xuta xi kuakjainre ngat'a tse'e Cristo xi je jesun 'ba jín nde kichaja ngayeje. ¹⁹ Tsa tu nixtjin xi tetsuba nganda'e techuyasa_ra mé= xi sjana Cristo, ña jín xi ngisa nima ña'an ngajinre xuta xi tjin ngasun'ndio.

²⁰ Tunga kjuakixi= nga Cristo ja'ayare ngajinre mik'en. 'Ba kui joni ture chan xi tjun, ngat'a kui xi tjun ja'ayare ngajinre mik'en. ²¹ Ngat'a jotsa'en ngat'are mé= xi kitsa'en jngu xuta ja'e kjuabeya ngasun'ndio, 'ba=nde tsa'en ngat'are mé= xi kitsa'en kja'e xuta kjua'aya nganire xuta ngajinre mik'en. ²² Ngat'a jotsa'en ngat'are Adán fesun ngatsi'i xuta, 'ba=nde tsa'en ngat'are Cristo

k'uendukun ngani ngatsi'i xuta.

²³ Tunga jotsa'en nga 'bakore nga jngu jngu 'ba=tsa'en kjua'ayare: Cristo tjun 'ba jaskan xuta xi tse'e nga kjua'e ngani kui. ²⁴ Tjun skja'are kjua'ñure ngatsi'i xi batexuma 'ba ko ngatsi'i xi tjinre xa 'ba ko xi tjinre kjua'ñu tsakaiñu, 'ba jaskan singantsja ña batexuma ngaya ntsja Naina xi Na'enchana, 'ba kio kjue ngasun'ndio ya'a. ²⁵ Ngat'a Cristo tjinnere nga kuatexumare ka'nda nga ngatsi'i xi stike k'uendungi ngi ndsaku. ²⁶ 'Ba enemigo xi fet'ani nga sikjekjua, kjuabeyo. ²⁷ Ngat'a Na'enchana kitsik'endungi ngi ndsaku Cristo ngayéje xi tjin. Tunga kionga tsu nga kjinik'endungi ngi ndsaku ngayéje xi tjin, tinchja tsejen nga bi ko Na'enchana tijñangi ngi ndsaku Cristo, ngat'a Na'enchana xi 'ba kitsa'en nga kui tjindungi ngi ndsaku ngayéje xi tjin. ²⁸ 'Ba nga s'endungi ngi ndsaku Cristo ngayéje xi tjin, 'ba=tsa'en ko Cristo xi Ki'ndire Na'enchana mani singantsja yojore nga k'uejña ngixkun xi 'ba kitsa'en nga ngi ndsaku kis'endungi ngayéje xi tjin. 'Ba 'batsa'en Na'enchana tu kui tajngu tse'e kuanni ngayéje xi tjin.

²⁹ 'Ba tsa bi kjua'aya nganire ngajinre mik'en, ¿jót'sa'en machjen nga xuta batenda yojore ngojore mik'en? Tsa kjuakixi nga bi kjua'ayanire xuta, ¿ánñu tsa'enni kibiú?

³⁰ 'Ba ¿ánñu tetsubanií jngu kjuabenichun xi tu tsjenngichantsjaí tsa bi fa'ayare mik'en? ³¹ Ngat'a an nts'ia, nyujun nyujun tjenngina kjuabeya. Kjuakixi= xi xin_nuu jotsa'en kjuakixi nga tsja=mana nga makjainnu ngat'a tse'e Na'enna Je-

sucristo. ³² Tsa tu ngat'are mé= xi mejénre xuta, tsa kui kjua kiskjankoña tjiuba ts'en xi tjindu naxinanda Éfeso, tsa 'ba kitsa'aan, ¿mé= xi kitsa'enni_rā? Tsa bi kjua'aya nganire mik'en, ¿ánñu bi si'anña jo tsu xuta: “Xinia 'ba s'ia, ngat'a nyujunni kueyaña”?

³³ Bi ba'e'ndio nga s'ejñunu. “Xi tsjenko xuta ch'okun, 'ba=nde ch'okun 'betju.” ³⁴ Tikja'etsjen ngañu xi kixi tjin 'ba bi nde minyijeñu. Ngat'a tjin= yak'a ngajinnu xi bi be Na'enchana. 'Ba xin_nuū, tuxi kuasubaninu.

³⁵ Tunga tsa tjin xi 'ba kuetsu: “¿Jótsa'en kjua'aya nganire mik'en? ¿Mé= yojo xi kua'a ngani?” ³⁶ ¡Xuta chikun! Xujma xi s'entje bi fesu tsa bi tjun s'eyanijin 'ba k'uantjaiya. ³⁷ 'Ba bi tsa kui xi s'entje kui xi kjuesu, tusa xujma sani, tsa xujma trigo asa kja'e xujma. ³⁸ Tunga Na'enchana tsjare isen xujmo xi mejénre sjare, 'ba tsjare nga jngu tsujmi ntje isen jotsa'en nga 'bakore xujmare.

³⁹ Jotsa'en tjin kja'e kjuanga kuya xujma ko tsujmi ntje, 'ba=nde tjin kja'e kjuanga kuya yojo ngayeje. Kja'e= kun yojore xuta, kja'e= kun xi tse'e tjiuba, kja'e= kun xi tse'e tjiunise, 'ba kja'e= kun xi tse'e tjiuti. ⁴⁰ 'Ba 'ba=nde kja'e kun isen xi tjin ngank'aa ko xi tjin t'anangiu ngayeje, 'ba kja'e tsa'en tsitsejen xi tjin ngank'aa ko xi tjin t'anangiu. ⁴¹ Tsu'biu kja'e tsa'en tsitsejen, 'ba na'enso kja'e tsa'en tsitsejen, 'ba niñu kja'e tsa'en tsitsejen ngayeje. 'Ba nga jngu jngu niñu xi tjin kja'e kja'e tsa'en tsitsejen.

⁴² 'Ba=nde kuan nga kjua'aya nganire xuta ngajinre mik'en. S'eyanijin= xi fe'ndu, tunga

xi kjua'aya nganire bi nde kjue'nduni. ⁴³ Xi s'eyanijin kjuasuba tsja, tunga xi kjua'aya nganire s'e=re kjuaje. S'eyanijin= xi inda, tunga xi kjua'aya nganire s'e=re nga'ñu. ⁴⁴ S'eyanijin= yojo xi ya'a xuta, tunga kjua'aya= nganire yojo xi Isennixtjintsjere Na'enchana sjare kjuabenichun. Tsa tjin yojo xi tu xuta ya'a, ngu, 'ba=nde tjin yojo xi Isennixtjintsjere Na'enchana tsjare kjuabenichun ngayeje.

⁴⁵ Jotsa'en kua'indut'a enre Na'enchana: "Xuta xi tjun xi Adán 'mi, kui xi kjininda 'ba kitsa'ere kjuabenichun." Tunga Adán xi fet'ani, kui xi kuán Isennixtjintsje xi tsjare kjuabenichun xuta. ⁴⁶ Tunga mé= xi tsja Isennixtjintsjio bi titjun ndiba, titjun= ndiba xi xuta ya'a, 'ba jaskan xi tsja Isennixtjintsjio. ⁴⁷ Xuta xi tjun chojore t'anangiu kuandakoni, tunga xuta xi majóni ngank'aa jendibajenni. ⁴⁸ Jo kji'i xuta xi chojore t'anangiu kuandakoni, 'ba=nde kun ngatsi'i xi tse'e t'anangiu. 'Ba jo kji'i xuta xi jendibajenni ngank'aa, 'ba=nde kun ngatsi'i xi tse'e ngank'aa. ⁴⁹ Jotsa'en nganda'e kich'a= isenre xuta xi kuandakoni chojore t'anangiu, 'ba=nde tsa'en x'a= isenre xuta xi jendibajenni ngank'aa.

⁵⁰ Xin_nuu kibi, nts'ia, nga yojo xi kich'a nganda'e bi kuan saku'ndere ña batexuma Na'enchana. Ninga xi fe'ndu bi saku'ndere ngajinre xi bi fe'ndu. ⁵¹ Tjinu'yo kjua'mobi. Bi ngatsi'a kueya, tunga k'uantjaiya tsi'iña. ⁵² Jotsa'en kitsa 'bechja 'ba chjux'a tuxkuan, 'ba=tsa'en kitsa k'uantjaiya kionga kjuane tjio xi fet'ani. Ngat'a nga kjuane tjio, mik'en kjua'aya

nganire 'ba bi nde kueya ngisani, 'ba k'uantjaiya tsi'ña. ⁵³ Ngat'a yojo xi kich'a nganda'e xi fe'ndu, kuan ngani yojo xi bi nde fe'nduni. 'Ba yojona xi 'me nganda'e, kuan ngani yojo xi bi nde 'meni.

⁵⁴ 'Ba kionga xi fe'ndu kuan ngani xi bi nde fe'nduni, 'ba yojo xi 'me kuan ngani yojo xi bi nde 'meni, kio= k'uetjusun en xi kua'indut'a enre Na'enchana: “Xi kitsa'en, kui xi kitsikjekjua kjuabeyo. ⁵⁵ ¡Ji kjuabeya! ¿Jótsa'en si'an ngani? ¡Ji kjuabeya! ¿Ñá tijña nga'ñu xi sik'enkoni xuta?”

⁵⁶ Ngat'a nga'ñure kjuabeyo, jio. 'Ba nga'ñure jio kjuatexumo ndibanire. ⁵⁷ Tunga ba'e_ra kjuanda Na'enchana xi tsa'en nga ña'an_ra je ko kjuabeya tu ngat'are Na'enna Jesucristo.

⁵⁸ 'Bamani, nts'ia xi tsimijaan, kixi tyny 'ba bi nichojo yojonu. Ngantsjai tangiko nduju xare Na'enna Jesucristo, ngat'a 'yañu nga bi tu kjuatjo xi teño'on nga ña'axat'a_ru kui.

16

¹ 'Ba ngat'are ton xi tjis'eku ngat'a tse'e xi makjainre ngat'a tse'e Na'enna xi tjindu Jerusalén, 'ba nde ti'on jo kixin_ra nts'ia xi tjindu nangi Galacia. ² Xki tamingu nga jngu jnguu t'ejñat'axinchiu ton, jotjin sakunu. 'Ba t'ejñatjo tuxi kionga kjuechukun_nuu bi tjinnere nga xja'asunñu ton. ³ 'Ba kionga kjuechaa, sikasian naxinanda Jerusalén xuta xi jun xja'ajiun 'ba sja_ra xujun xi tsjare kjua'ñu, tuxi kuekoni ton xi kiko'o ngat'a tse'e nts'ia xi tjin ngajaan. ⁴ 'Ba tsa nda tjin nga ko an kjuia, ngu, ñatjen jín kuekona.

⁵ Kio kjuikun_nuu jaskan nga kjua'aa nangi Macedonia, ngat'a tjinne=re nga kjua'aa nangi

xi kio tjin. ⁶ 'Ba= kuan tsa kuatejñako_nuu chuba nixtjin asa kio kjua'ana nixtjinre nch'an, tuxi kuan kuisekonuu ña jaskan kjui ngaña. ⁷ Ngat'a bi mejénna nga tu kjua'axtiu_nuu. Tusa mejénna kuatejñako_nuu chuba nixtjin, tsa Na'enchana tsja'ndenā. ⁸ Tunga kuatejñaa naxinanda Éfeso ka'nda nga kjua'e s'i pentecostés. ⁹ Ngat'a tixa'nde=nā nga sa'aan jngu xa xi nda, ninga nkjin xi bi mejénre nga 'ba sa'aan.

¹⁰ Tsa kjuechukunnu Timoteo, nda chjubetjo, tuxi tsja s'enire nga k'uejñajinnu. Ngat'a ndekui xare Na'enna Jesucristo tsa'enni joni an. ¹¹ 'Bamani, tu'yá ngatabeton. Tusa tiseko nga ngatjas'ere kjuaxiu nga janda sa'en ndiya, tuxi kjua'ekunnina nga'e. Ngat'a an ko nts'ia xi yak'a techuyee nga kjua'e.

¹² 'Ba ngat'are nts'ia Apolos, 'ñu= 'ene_ra tsakaiñu nga kueko nts'ia xi kjuechukunnu. Tunga bi kuakjainre nga kuaje nganda'e. Kio kuaje nga kuan xi sa'en.

¹³ Tetsubachun 'ba kixi tinyo ngat'are xi mak-jainna. Ti'ñu kakún 'ba tenga'ñu. ¹⁴ 'Ba ngayéje xi si'on ngatakutsejen kjuanimejénnu.

¹⁵ Nts'ia, 'yañu nga xinkjin xuta chinga Estéfanos kui xi tjun kuakjainre enre Na'enchana ngajinre xuta xi tjin nangi Acaya, 'ba kui tu kuifa ni xa inyatsa'en sa nganda'e nga inyabaseko nts'ia xi yak'a. ¹⁶ Temi'a_nuu nga tik'etjusun_ru xuta xi joni kui 'ba ko ngats'i xi 'ñu tsa'exa ngat'are xabi.

¹⁷ Tsja= manā nga ja'ekunna Estéfanos ko Fortunato 'ba ko Acaico, ngat'a kui= xi tsakasekona ngojonu. ¹⁸ Kitsjana kjua'ñu kakun jo kitsa'en

ngajinnu ngayeje. Kui kjuañu chakunñu xuta xi joni kui.

¹⁹ Inyatsikasen_nuu kjuate'nda nts'ia xi tjin nangi Asia. 'Ba nde Aquila ko Priscila 'ba ko ngatsi'i nts'ia xi mañajan ndaba 'ñu tsikasennu kjuate'nda ngat'are Na'enna Jesucristo. ²⁰ 'Ba ngatsi'i nts'ia xi tjin nga'e inyatsikasennu kjuate'nda. 'Ba ko kjuanimejen xi tsjana Na'enna tite'nda_ru xingiu ngayeje.

²¹ An Pablo ko ndsaa tetsi'indu_nuu kjuate'ndana.

²² Tsa tjin xi bi tsimején Na'enna Jesucristo, kui xi ngatjas'ejñat'axinre Na'enchana. ¡Ndibai Na'en!

²³ Ngatjas'enu kjuandare Na'enna Jesucristo.

²⁴ Tsimején_nuu ngatsi'u ngat'are Cristo Jesús.

El Nuevo Testamento Mazateco de Ayautla **New Testament in the Ayautla Mazateco language of** **Mexico**

copyright © 2009 Wycliffe Bible Translators, Inc.

Language: Mazateco, Ayautla

Translation by: Wycliffe Bible Translators, Inc.

Mazateco, Ayautla [vmy], Mexico

Copyright Information

©La Liga Bíblica, A.C., 2009

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazateco, Ayautla

©Wycliffe Bible Translators, Inc., 2009

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

776ced1d-6ea7-59c3-8389-b2a94420d3be